

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



Ianuari - Iuni

2026



TUSI MO MAFUTAGA AUTALAVOU

Saunia :

Ofisa o A'oa'oga Kerisiano

TUSI AOGA AUTALAVOU
FEPUARI – IUNI, 2026

ASO SA – FEPUARI 01, 2026. “FA’ATALATALANOAGA FA’A – MATAUPU SILISILI”

MATAUPU 1: “O LE ATUA TOLU TASI PAIA.”

TUSI FAITAU – MATAIO 28: 9

FA’ATOMUAGA: O le amataga o mataupu o lenei tausaga aoga, ua manatu ai se’i tatou mua’i amata i nai mafauauga faigofie e uiga i le talitonuga o le tatou Ekalesia i le “TOLU TASI PAIA” o le Atua le Tamā, le Atua le Alo, ma le Atua le Agaga Paia. O nai motuga ‘afa e mua’i amata ai mafauauga o tupulaga pe toe fafagu ma fa’amanatu pea iā i latou lenei mataupu silisili tāua i le fa’atuatuga fa’a-Kerisiano.

Ua tupu a’e lava se lagona e fa’asoa mo nai o tatou tupulaga i se ala faigofie e amata ai ona tau fa’amautū atili o latou loto ma mafauau i le fa’atuatuga o le Ekalesia ma ona talitonuga i le Atua le Ao o le Ekalesia. Na tau ane le faitau fa’asamasamanoa i le tasi aso i le vaega o le fa’avae a le Ekalesia i lona amataga lava i upu fa’ai’u o le upu tomua e fa’apea, **“Ua auai fa’atasi i le loto gatasi e fa’avaeina, le Ekalesia Fa’apopotoga Kerisiano i Amerika Samoa; “O se fa’apopotoga o tagata fa’atuatua ua loto atu e tapua’i i le ATUA LE TAMĀ, LE ALO, MA LE AGAGA PAIA.”** Ua tupu ai se lagona e fa’alatele atili ma toe fa’amanatu i nai manatu faigofie e u’una’ia ai pea tupulaga i le talitonuga o le Ekalesia Fa’apopotoga Kerisiano i Amerika Samoa.

FESOASOANI MO LE FA’ATINOAGA O LE MATAUPU:

E lelei ona tatou amata i si fesili faigofie lea ma lona tali, e amata ai le fa’atalatalanoaga ina ia tatala ai le fa’asoa ia nanea se a’oa’oga e maua e tupulaga mo lenei afa’afi. E iai foi le manatu e sili atu ona fa’atalanoa muamua le fesili i le Autalavou, ina ia iloa tonu ai so latou taofi ma se tulaga tonu o lo’o i ai lo latou malamalama ma so latou talitonuga i le **Atua Tolu Tasi Paia**, ona momoli ai lea o le fesoasoani faigofie ua tu’uina atu fa’atasi ai ma se tapenaga a lau Susuga i le ta’ita’i, o le ā lautele ai lo latou iloa o le mataupu ma malamalama tonu ai.

FESILI : Aiseā ua talitonu ai le Ekalesia Fa’apopotoga Kerisiano i Amerika Samoa ma Ekalesia Kerisiano uma i le Atua Tolu Tasi Paia. (God as the Holy Trinity)? E mafai foi ona toe fa’aupe le fesili fa’apea – Aiseā ua manatu ai Ekalesia Kerisiano, o le ATUA MONI, O LE ATUA TOLU TASI PAIA, O LE TAMĀ, LE ALO MA LE AGAGA PAIA. (God as the Holy Trinity of the Father, Son, and the Holy Spirit.)?

TALI FA’AMALAMALAMA:

E lē o aumaia tu’u sa’o e le Tusi Paia le talitonuga i le ATUA TOLU TASI PAIA. O le uiga o lea manatu, e lē o fa’apea mai le Tusi Paia, na faia e le Atua Tolu Tasi Paia le lagi ma le lalolagi i le amataga. E lē o fa’apea mai foi, na liutino tagata le ATUA TOLU TASI PAIA ia IESU KERISO. Ae o le tulaga tonu o le talitonuga o le Ekalesia Kerisiano e fa’apea- “O lo’o molimau le Tusi Paia atoa i le Atua na fetalai ma galue mai i auala na fa’aalia manino ai lona natura manino (clear nature) ma le uiga tonu (true character) lea o le Atua o lo’o fa’aalia i ana Afioga Paia, ma ana galuega mamana, e tusa o le molimau aoao a le Tusi Paia. E matuā manino le natura Tolu Tasi o le Atua i le molimau a le Feagaiga Fou i le fa’atasi mai ma le galue mai o le Atua iā Iesu Keriso, e ala i le Agaga Paia.” (The Father is revealed in the Son through the Spirit or God is known in Christ through the Spirit.)

Afai la o le ala lea na iloa ai le Atua i lona fa'aali mai o ia lava, o le ala foi lenā e tataua ona molimau atu ai le Atua i le lalolagi. Ma o le amataga sa'o foi lenā o mafaufauga i le fa'avae fa'a- le Tusi Paia o le talitonuga i le Atua moni. O le fa'avae pito malosi o le talitonuga o le Ekalesia i le Atua Tolu Tasi Paia, o le malelega a Iesu Toetu le Ao o le Ekalesia, ma le pule aoao i le lagi ma le lalolagi e pei ona fa'amauiina i le Mataio: **“O lenei ia outou o atu e fai nu'u uma lava ma so'o ma papatiso atu iā te i latou i le suafa o le Tamā, ma le Atalii, ma le Agaga Paia. Ia outou aoao atu i ate I latou, ia tausii I mea uma ua ou fai atu ai ia te outou, faauta foi oute ia te outou I aso uma lava, e oo lava I le gataaga o le lalolagi”** (Mataio: 28: 19 -20).

E lē gata ina avea le papatisoga o tagata i le suafa o le Atua Tolu Tasi Paia ma fa'aailoga o le avea o i tatou ma Kerisiano moni, ae na fai foi le talitonuga i le Atua Tolu Tasi Paia, ma talitonuga i le Atua moni i tapuaiga i sauniga fa'ale- agaga, ma feso'ota'iga fa'ale -Ekalesia a le 'au Kerisiano i le Ekalesia i Korinito. – “Ia iā te outou uma lava le alofa tunoa o le alii o Iesu Keriso, ma le alofa o le Atua, atoa ma le mafuta fa'atasi ma le Agaga Paia, (2 korinito – 13: 14). Ua manino atili foi le tāua loloto o le talitonuga i le Atua Tolu Tasi Paia i le ta'utinoga fa'ale- fa'atuatua a le 'Au-Aposetolo, ua faia pea ma ta'utinoaga tau've a le Ekalesia Kerisiano i o latou vaitaimi ma tatou foi.

UPU FA'AI'U –

E i ai le manatu o le ā fa'agata i'inei le tatou fa'asoa mo lenei afiafi, talitonu ua amata ona matalatala lagona o tupulaga i se fa'amalamalamaga manino a lau Sususga a le Fa'afegaiga e amata ai lenei mataupu lē faigofie. Ae o le ā fa'aauau atu i le vaiaso a sau. Malo le fa'asoa.

MANUIA TELE LE SAVALIGA O LE TAUSAGA.



ASO SA – FEPUARI 08, 2026 “FA'ATALATALANOAGA FA'AAUAU”

MATAUPU 2: “O LE TOLU TASI PAIA”

FA'ATOMUAGA: Ua fa'aauau le talanoaga i lenei Aso Sa i le mataupu e pei ona tu'uina atu. Pei lava ona silafia, e lē se mataupu la'iitiiti ma faigofie le mataupu o taumafai atu nei. Peita'i, ua taumafai lava i nai manatu faigofie e toe matimati ai le talitonuga o tupulaga i le Atua soifua o lo'o tatou tapua'i i ai. Ua tele talitonuga ma faiga, ma ua fesoua'ina foi lagona i le mau tala'iga ma tapua'iga e tele ua o'o mai i lo tatou atunu'u. Ua saili foi tagata i le mea e tusa ma lona lava talitonuga. O le ala lea ua fa'amoemoe tele atu ai i la outou fesoasoani a le 'aufaigaluega e fa'alatele atili ai se vaivai o le taumafaiga nei mo nai tupulaga. Ua matou fa'ama'ite atu, ae tatalo atu i le loto maulalo i le tumu ma le 'oa fa'ale - Agaga o lo'o iā outou Susuga, o le ā mapo totoga ai tupulaga i o tatou lava talitonuga fa'avae. A mautū lo latou talitonuga i le Atua Tolu Tasi Paia, o le ā mautū ma tumau pea i latou i o tatou talitonuga.

FESOASOANI MO LE FA'ATINOAGA O LE MATAUPU:

E manatu foi e lelei ona tatou amata i le fesili lea e tata'i uma i ai manatu o tupulaga i le vaega lua lenei o le mataupu i le Atua Tolu Tasi Paia. Ua tu'uina atu le fesili ma si ona tali e faufau ai le fa'alateleina o le mataupu. E tāua pea ona tu'uina atu muamua le fesili mo le Autalavou e fa'aailoa ane ni o latou manatu. E fa'apea foi i le 'au matutua o le Autalavou o e o le ā mafuta ane i so latou talitonuga ma so latou taofi i le fesili o lenei afiafi. Ae alo maia, o le soso'oga lenei o le tatou faatalatalanoaga mai le Aso Sa ua mavae.

FESILI: O le ā le uiga tonu o le talitonuga o le Ekalesia i le Atua Tolu Tasi Paia? E mafai foi ona toe fa’auapu le fesili i lona uiga lava e tasi e fa’apea, O le ā le uiga tonu o le talitonuga o le Ekalesia i le Atua le Tamā, le Atua le Alo, ma le Atua le Agaga Paia?

TALI FA’AMLAMALAMA MO LE FESILI:

O le uiga tonu o le talitonuga o le Ekalesia i le Atua Tolu Tasi Paia, e tasi lava le Atua i ona Peresona e tolu. O le Atua o le Tamā, o le Atua o le Alo, o le Atua o le Agaga Paia. O le Atua na faia le lagi ma le lalolagi i le amataga, o ia lava na fa’aolaina le lalolagi iā Iesu Keriso i le fa’aatoaga o tausaga, e pei ona molimau i ai le Agaga Paia. O le Atua na fa’asa’olotoina Isaraelu mai le pologa i Aikupito, o le Atua lava lea na ia fa’asa’olotoina le tagata mai le pologa o le agasala ma le oti, e ala i lona fa’atuina o Iesu Keriso mai le tu’ugamau ma le oti. E lē gata i lea, o le Tamā le Alo ma le Agaga Paia, o le suafa lea o le Atua. O le suafa o le Atua na fa’atonu ai e Iesu Keriso le ‘au so’o e papatiso ai tagata uma i le tala’iga o le galuega fa’aola i le lalolagi.

FA’ATINOGA: Ia sailiili fa’atasi i tusi faitau ua ta’ua i lalo, o lo’o fa’aalia ai le feso’ota’iga, ma le galulue fa’atasi o Peresona o le Atua Tolu Tasi Paia, i le tulaga e manino ai le tasi o le Atua, e ui ina tolu ona Peresona. O le ā fa’aalia ai foi, o le atoaga o le fa’atasi mai o le Atua i ana galuega fa’aola ma le fa’aaliga o lona mana, e galulue fa’atasi lava ona Peresona e tolu. E tāua foi mo tupulaga ina ia taofī mau i ai e fa’amautū ai le talitonuga i le mataupu i le Atua Tolu Tasi Paia, e tasi lava le Atua e ui i le tolu o ona Peresona. O le a faaaliga ai foi, o le atoaga o le faatasi mai o le Atua I ana galuega faaola ma le faaaliga o lona mana, e galulue faatasi lava ona peresona e tolu.

1. 1 Korinito 12: 4 – 6; 2 Korinito 1: 21 – 22; Kalatia 4: 6; Efeso 2: 20 – 22; 2 Tesalonia 2: 13 – 14; Tito 3: 4 – 6; 1 Peteru 1: 2.
2. O le papatisoga o Iesu e tusa ma le tala a Mataio. *“Ua papatisoina Iesu, ona maliu a’e loa lea o ia nai le vai, fa’auta foi, ua fa’aavanoaina le lagi iā te ia, ua ia iloa atu foi le Agaga o le Atua ua afio ifo e peiseaī se lupe, ua o’o i ona luga. Fa’auta fo’i o le si’ufofoga mai le lagi, ua fa’apea mai, “O lo’u atalii pele lenā, ua ou fiafia lava iā te ia”* (Mataio 3: 16 – 17). Ia maua le galulue fa’atasi o le Tamā ma le Alo ma le Agaga Paia i le taimi e tasi.
3. O le fa’aaliga a le Agaga Paia iā Ioane, i le fa’amaoniga o le manumalō o le satauro o Iesu Keriso (Fa’aaliga 5: 1 – 10). Ia maua le iloa atu o le Alo ma le Tamā e ala i le Agaga. O lo’o i ai le Toeaina o Ioane i le Agaga i le taimi na ia iloa atu ai Iesu (fuaiupu e 6) ma le Atua (fuaiupu7) e tusa ma le fa’aaliga.

UPU FA’AIU -

Ua talitonu foi le Ekalesia ma Ekalesia Kerisiano uma, o Iesu Keriso lava ua fa’aalia ai le Atua moni, auā sa iā te ia le tumu atoatoa o le Atua, e pei foi ona i ai i le Tamā, ma le Agaga Paia. O le mea lea e atoatoa ai lava so’o se tapua’iga e fai i le suafa o le Tamā po’o le suafa o Iesu Keriso po’o le suafa o le Agaga Paia. Ua tatou iloa foi ma le mautinoa i’inei le fa’amaoni o le talitonuga o le Ekalesia auā ua tatou feagai tonu ma le Tamā e pei o Isaraelu i le Feagaiga Tuai. Ua tatou feagai tonu foi ma Iesu Keriso e pei o le ‘au Kerisiano i le Feagaigaa Fou. Ae ua tatou feagai tonu foi ma le Agaga Paia i o tatou vaitaimi. E tusa ma le talitonuga i le Atua Tolu Tasi Paia, o lo’o o tatou feagai pea ma le Tamā ma le Alo e ala i le Agaga Paia.

MATAUPU 3: “O LE TOLU TASI PAIA”

TUSI FAITAU –

FA’ATOMUAGA: Ua manatu o le ā fa’ai’u atu i lenei Aso Sa, se taumafaiga e fa’ama’ite lenei mataupu tāua mo a tatou tupulaga. O si a tatou fa’asoa mo lenei masina i nai mafauauga faigofie e toe fafagu ai a tatou tupulaga ia maua’a pea le fa’atuatua ma le talitonuga i le TO’ATASI O LE ATUA, e pei ona taumafai atu ai i nai Aso Sa e lua ua tuana’i. Ou te taofi foi ua maua se malamalamaga atili e toe polili ai i tupulaga lea foi talitonuga fa’avae o le tatou Ekalesia ma le ‘au Kerisiano fa’atuatua i le Atua Tolu Tasi Paia.

O le ‘anofale lava o le fa’amoemoe ia tapena tupulaga e tali atu i le tele o le mau tala’iga o talitonuga eseese ua i ai nei. E leai foi se manatu ina ia taumafai e fai ni finauga po’o ai e sa’o a’o ai e sesē. A’o le fa’amoemoe ia lē se’e ‘ese a tatou tupulaga mai le talitonuga fa’a - Kerisiano i le Atua. E ui lava ina tolu ona suafa po’o Peresona, ae tumau lava **le tasi o le Atua**. Ia tapena pea a tatou tupulaga ia mausalī ma maua’a i lo tatou fa’avae ua uma ona fa’ata’oto mai le amataga, **‘O LE EKALEZIA FA’APOTOPOTOGA KERISIANO I AMERIKA SAMOA, O SE FA’APOTOPOTOGA O TAGATA FA’ATUATUA, UA LOTO ATU E TAPUA’I I LE ATUA LE TAMĀ LE ALO MA LE AGAGA PAIA”**

SINA FESOASOANI MA LE FA’ATINOAGA O LE MATAUPU:

E pei ona taumafai atu, ua saunia lava le fesili e tatala ai le mataupu i Aso Sa ta’itasi. O i’ina foi o lo’o paū i ai le fa’amamafa o le fa’amalamalamaina o le Atua Tolu Tasi Paia. O nai fesili foi ia e manino ai le ‘ese’ese o a’oa’oga i nei Aso Sa e tolu. Ia tautuana lava ia manino tupulaga i le ‘ese’ese o faamamafa oi i ai i fesili, e iloa ai e i latou le lautele o le mataupu pe ā o’o ina matuā talanoaina ma su’esu’e i ai. Ae o se amataga faigofie lea mo so latou malamalamaga i le mataupu.

O le fesili mo le nei Aso Sa,” **E fa’apefea ona olaina e tagata Kerisiano e i ai ma le tatou Ekalesia le uiga ma le fa’amoemoe o le talitonuga i le Atua Tolu Tasi Paia”** E lelei foi ae tu’u sa’o loa le fesili **lea i tupulaga, Ae a tatou tupulaga, o fa’apefea ona tatou olaina lo tatou fa’amoemoe lea i le Atua Tolu Tasi Paia?** Fa’amolemole o le faiga lava e matalatala ai lagona o le mafutaga, o le tu’uina muamua i ai o le fesili e fa’asoa ai ma i latou i ni o latou manatu, ona fa’atalanoa loa lea o si tali faigofie ua saunia atu, ae fa’ai’u i se aotelega malamalama a lau Susuga a le ta’ita’i e tusa o le mataupu. Mo lenei lava Aso Sa ua tu’uina atu tali i se faiga tu’u sa’o ma le faigofie ae fa’aopopo pea lau Susuga mo le fa’alauteleina i tupulaga.

TALI O LE FESILI FA’AMALAMALAMA:

1. E ao ina mua’i talia e le tagata Kerisiano, o le Atua moni e tusa ma le talitonuga o le Ekalesia Kerisiano ma tatou foi, o le Atua le Tamā, Le Alo ma le Agaga Paia.
2. Ia mautinoa, o le ta’utino atu i le lalolagi o le Atua moni, o le Atua Tolu Tasi Paia, o le puipuiga lava lea o le Tulaga maualuga o le Tusi Paia i le fa’atuatua fa’a- Kerisiano. E mafua lea tulaga ona o le talitonuga o le Ekalesia, o le Atua Tolu Tasi Paia, o le Atua moni lea o lo’o a’oa’o mai ai le Tusi Paia, ma o lo’o fa’asino i ai e le Tusi Paia le lalolagi ia talitonu ma fa’atuatua i ai i le Atua lenā e to’atasi.
3. O le ala foi lea o le fa’aaogaina o le suafa lea o le Atua i tapua’iga i sauniga fa’ale- agaga ma feso’ota’iga aloaia a le Ekalesia Kerisiano.

4. E tāua foi i talitonuga a nisi o le ‘au Kerisiano ua latou manatu, o nisi o uiga aogā o le Tolu Tasi Paia mo le olaga i aso uma, o le fa’ata’ita’iga: e maua mai ai le mea e ta’u o le alofa moni, ma le galulue fa’atasi. E fa’apea le manatu, o nisi ia o uiga manino i le feso’ota’iga o Peresona e tolu o le Tolu Tasi Paia, i lona lava natura moni, aemaise ai i lona fa’aali mai i ana galuega mamana.
5. O le mataupu silisili o le Atua Tolu Tasi Paia, e maopoopo ai le fa’atuatuaga o le Tusi Paia, aemaise foi o le uiga tonu ma le natura moni o le Atua e pei foi ona lagona e le tagata ola e talitonu atoa i le Atua ma lona finagalo, ma ana galuega.
6. Fa’amolemole, aua le taofia le fetufa’a’iga i nisi manatu e tele e fa’atatau i le olaina o le Atua Tolu Tasi Paia, e tupulaga ma i tatou uma foi. Fa’asoa pea pe ā lava le taimi.

UPU FA’AI’U:

E iai le taofia o le ā fa’agata ai i le Aso Sa lenei le mataupu e pei ona tatou fa’asoa i ai. E fai aso pea le Alii, sa’ili’ili foi nisi manogi o le Talalelei ona toe fa’asoa atu foi lea i le lumana’i. Talitonu foi le taofi ua mafai ona maua ni manatu ma ni lagona fou o tupulaga e matimati ai pea la latou savaliga i le lumana’i, aemaise lava o le talitonuga i le Atua Tolutasi ia lē fa’aluaina e se isi lava malosī ma ni fa’atosina. Fa’afetai atu ai iā outou Susuga i Fa’afeagaiga ma ta’ita’i o Autalavou i le tau fa’amalamalamaina ma momoli se tapenaga auā le mataupu. Talosia ia i le alofa o le Atua ua maua se fa’amalosī ‘au mo tupulaga e ala i sa tatou taumafaiga fai fa’atasi, e fa’atumau lo tatou fa’a- Efkas o le talitonuga e taputa’i i le Atua le Tamā, le Alo ma le Agaga Paia.

MANUIA LE AFIAFI, MALO LE FAASOA



**ASO SA – FEPUARI 22, 2026 “AGANU’U” (E FA’AVAVAU AIGA)
MATAUPU - “O LE AIGA POTOPOTO” (Vaega 1)**

UPU TOMUA: Ua i ai le manatu se’i vavae foi foe i le fa’ai’uga o le nei masina, e ala i lo tatou toe manatunatu i nisi o ā tatou measina, o ā tatou tu ma aganu’u faigofie se’i toe fa’amanatu pea a’o tatou aga’i atu i le suiga o ia mea i le lalolagi o tatou i ai nei. O le fa’amoemoe, ia saga fa’amautū i mafaufau ma loto o tupulaga ma fanau a le Ekalesia lo tatou fa’asinomaga moni, o tatou o Samoa auuliuli moni lava.

Ua maitauina pea le tele o aiga ua faia fa’atasiga (reunion) i lea tausaga ma lea tausaga. O le fa’amoemoe o lo’o ta’oto ai i ia fa’atasiga, o le toe taumafai lea ina ia fa’atasitasi le aiga atoa, ma toe fa’amalamalama tupu’aga, i fanau ma tupulaga lalovaoa, o le vaitau ma le lalolagi ua tatou i ai. Ia malamalama tupulaga ma fanau i gafā ma so’otaga o tagata o le aiga. O se mafaufau talafeagai lea, ua ou manatu ai e fai se sao e toe fa’atāua ai i tupulaga le iloa o lona fa’asinomaga ma lona tupu’aga, auā fai mai le mau ua iloga i lenei vaitau, **“E fa’avavau aiga”**

Ua mafuli tupulaga i le upu lea, ae lelei foi ona toe fa’amanatu i ai ina ia iloa ma mautinoa ai e tupulaga, e leai se tagata e ola fa’aloaloa vale, e aunoa ma sona fa’asinomaga, **o le aiga**. Ua na o se manatu ua tupu a’e, ua afua ai lenei mataupu, atonu foi o le ā mafai ona malamalama tupulaga i lea mea, ina ia taofia ai nisi o fa’afitauli tutupu pea i tupulaga e pei o le toe fēnofoa’i ai, ina ua lē malamalama i le fa’asinomaga ma lona gafā. Fai mai le upu ua masani ai le atunu’u, “e tele atu a’a o le tagata nai lo’o a’a o le la’au.”

E i ai foi le taofiga o le ā lē mafai lava ona tutusa uma o tatou taofi, auā o le atunu'u e mau 'ese'ese ma talalasi, o le ala lea o le ā lē o'o ai i le loloto o le aganu'u a le atunu'u, ae o le ā amata atu fa'apea.

SINA AOTELEGA O LE AIGA POTOPOTO.

O le aiga, o le ogātotonu o le soifuaga lelei ma le manuia o nu'u, malō, atunu'u, aemaise lava Ekalesia. O le tele o aiga o lo'o soifua ai i le nu'u, o se aiga to'atele po'o se aiga potopoto. E aofia ai tamā ma tinā matutua, o matua, matua o matua, uso ma tuafafine ma fanau. E tāua le malamalama lelei i tagata o se aiga e amata mai lava i le matai se'ia o'o i le fanau. E tāua le iloa o faiā, gafa, sulii, le va o tagata o le aiga, o tofiga ma tiute fai, auā le manuia lautele o tagata uma o le aiga atoa. O suafa matai ma fanua o le aiga, e i lalo o le tausiga fa'amalumalu a le matai sa'o, ae aiā uma i ai tagata o le aiga, e tausia ai le soifua manuia ma le filemū o le 'au aiga atoa. O le to'atele o se aiga, o le tele foi lea o lima e galulue fa'atasi ma pulupululima fa'atasi mo le manuia o le aiga ma ona tagata.

O LE AIGA POTOPOTO

O le aiga, o le fatu lea ma le ola aupito sili ona tāua o lo'o soifua ai tagata nu'u uma o Samoa, ma e lē mafai lava ona suia ona fa'avae, e ui lava foi ina ua i ai le suiga o faiga i nisi aiga i nei aso. Peita'i, e sui faiga ae tumau lava fa'avae o aiga. O le aiga potopoto o se tu'ufa'atasiga lea o tagata e lē gata e so'o toto, ae mafai foi ona feso'ota'i i isi faiā, ma ua avea ai i latou o se aiga potopoto. O tagata o le aiga potopoto e aofia ai se matai alii ma lona faletua (to'alua o le alii). Po'o se matai tulafale ma lona tausi (to'alua o le tulafale). O taulele'a po'o aumaga, ma o latou taito'alua (fafine nofotane), o fafine ma o latou taito'alua (faiavā) o uso ma tuafafine o le tamā, po'o uso ma tuagane o le tinā, tamaiti ma fanau iti, ma isi tausoga 'ese'ese i lalo o le fa'amalumaluga ma le tausiga a le matai sa'o ua filifilia e le aiga potopoto. E nonofo fa'atasi i le fanua o lo latou aiga, ma e fetausia'i i so'o se mea, mo se manuia o tagata uma o le aiga. E mafai foi ona nonofo i isi nu'u po'o fanua fa'atau ua i ai i aso nei, ae fa'atasitasi pea i taimi uma, auā e mana'omia lava le galulue fegalegalea'i i fa'alavelave e fai a le aiga e pei o maliu, fa'aipoipoga, aso fanau, saofa'i, ma fuafua foi polokalame e manuia ai tagata uma o le aiga.

O NAI UPU E AO INA FA'ASOA MUAMUA I TUPULAGA INA IA MANINO AI LE MATAUPU.

1. aiga potopoto ----- extended family
2. alii -----paramount chief.
3. 'au aiga -----member of the entire extended family
4. aualuma -----women's organization
5. 'aufono a le aiga ----- family council
6. 'augafa'apae ----- respect title for women
7. 'aumaga ----- untitled man
8. fa'aipoipoga ----- wedding
9. faiā -----family relationships
10. faiavā ----- husband living with wife's family
11. fale-tele/fale-talimalo ----- family guest house
12. faleo'o ----- untitled man's residence
13. faletua ----- wife of the paramount chief
14. fanua tanu ----- family cemetery
15. finagalo 'autasi ----- concensus
16. gafa ----- genealogy
17. laoa ----- orator's residence

- 18. matua tausi ----- eldely mother/father
- 19. maota -----paramount chief's residence
- 20. nofotane ----- wife living with husband's family
- 21. ogaoga ----- matters of importance
- 22. pulapula lagoto----- elderly/ oldest member of the family
- 23. sa'o ----- most senior chief appointed as family steward
- 24. saofa'i ----- bestowment of chiefly tittle.

UPU FA'AI'U

O le fa’amoemoe mo le fa’asoa ia tufa atu i tupulaga ina ia iloa ma malamalama i ia vaega o tatou aiga. Ua tu’uina atu nai nanu aoao solo mai a le tusitala e tau fa’afai gofie ai i nai tupulaga uiga o ia upu e fa’alogo pea i ai i lo latou vaitau lenei. Ae talitonu lava le lagona ua i’ inā i lau Susuga le tofā ma le uta e fa’amalamalama ai le tāua o le mataupu i le tatou gagana, ma fa’asa’osa’o ane ai nai ata nanu ua tu’uina atu. Fa’amoemoe e fa’auau pea le fa’asoa lenei.

MANUIA LE FA’ASOA, E FA’AAUAU PEA.

////////////////////////////////////

ASO SA – MATI 01, 2026 “FA’ATALATALANOAGA FA’ALAU’ITELE

MATAUPU – “NOFO SAUNIUNI MA LE MITAMITA VALE”

SINI TULIMATAINA: “NOFO SAUNIUNI”

UPU TOMUA: O se fa’atalanoanoaga fa’alauaitel o le nei afiafi e fa’asoa ma fetufa’ ai ai ma tupulaga ina ia malamalama foi i le tāua o ia manatu e lua ua fai ma ‘autu, ina ia tatala le va’ai ma iloa ona fa’agasolo le olaga i totonu o le lalolagi faigatā o tupulaga ua i ai nei. O nai aoaoga manogi lava e tau ane ai le faitau ma manatunatu i ai lea ua fa’asoa atu ma le manatu o le ā fa’alautele e ā outou Susuga i nai tupulaga se taumafaiga ua o’o atu. O nisi ia o lagona ua maitauina ua tele ina pau’u ai nisi tupulaga ona ua fa’atamala ma to’ ilalo i ia lagona vaivai o le olaga, ma sesē ai le fa’amuamua ma le fa’amamafa mo le olaga manuia i le lumana’i.

O le ā tu’uina atu nisi o manatu ua maua mai iā i latou ua maoa’e lo latou atamai, atonu o le ā mafai ona toe timata ai le soifua o tupulaga pe afai ua a’afia i lagona o le lē nofo sauniuni ma le mitamita vale. E taua tele lea mo tapenaga i le olaga fegaoioia’i o lo tatou faimalaga ai nei. E leai ni manatu se tele mo le mataupu, auā o mataupu ua tautalagia so’o pea, ua tumu ai foi le Tusi Paia. A ua fia tu’uina atu pea e saga fafagu pea i tupulaga le tāua o le ola sauniuni ma le leaga o le mitamita vale.

NOFO SAUNIUNI MA MITAMITAVALE

O le nofo sauniuni, o le mataala, o le tapenapena, o le ola māgafagafa, va’ai mamao, ma nisi foi upu ua fa’amatalaina ai le uiga lelei lea, e fa’afeagai ma uiga leaga e pei, o le fa’atamala, paiē, fa’atalanoa, fa’atalalē, ola lē manatunatu, olaola noa, ma isi lava upu e fa’amatala ai uiga leaga ia.

O NAI MANATU MAI E ATAMAMAI E FETUFA’AI AI MA FA’AMALAMALAMA I TUPULAGA.

1. GEORGE WASHINGTON;

“O le sauniunia mo taua, o le tasi lea auala aoga mo le tausia o le filemu.” (To be prepared for war, is one of the most effectual means of preserving peace). E tele itu o lo’o sa’o ai pea lea fuaitau, pe ā fa’aaoga i isi vaega o le olaga. A ua popole tele lava le lalolagi i nei aso, i le gaosia

o mea tau, e fa'aono fa'atama'ia ai le lalolagi, pe ā fa'aaogaina mo taua. (nuclear weapons for mass destruction). E tāua pea foi le sauniuni mo ia mea.

2. JOHN WOODEN:

“O le leai o ni sauniuniga, o le tapenaga lea mo le to'ilalo.” (failure to prepare is preparing to fall). So'o se matātā o tatou galulue ai, e si'itia, e fa'aeaina ma manuia, pe ā sauniuni i taimi uma, aua le manatu māmā i ai. O tupulaga a'oga e lē sauniuni i mea a'oga, e mautinoa le lē manuia.

3. JOHN F. KENNEDY:

“O le taimi e tapena ai le atoina o lou fale, o aso la.” (the time to repair the roof is when the sun is shining). O le tatou upu masani, E lē aogā ona toe 'oti se pulou a ua to timuga” E taugatā tele le toe tau fa'aleleia o mea i se fale tutulu pe ā ma'ea ni timuga mamafa. Manatua foi, e lē o timuga uma e fesoasoani mai ai Amerika.

4. ELMER LETTERMAN:

“O le laki e tupu pe ā fetau le tapenapenaga ma le avanoa” (Luck is what happens when preparation meets opportunity). O mea e maua mai le vete e toe nimo ma foi atu lava i le vete. O mea lelei uma tatou te maua ona o sa tatou sauniuniga ma galulue aga'i i ai, e fa'aaogaina lelei foi auā ua saunia lelei i ai o tatou mafaufau. O le fa'amanuiaga lenā ua tatou ta'ua o le laki (lucky). Ia amuia i tatou ona o lea fa'amanuiaga.

5. VERN MCLELLAN:

(a). O sauniuniga o le asō, e fa'alagolago i ai mea o le lumana'i.” (Today's preparation determines tomorrow's achievement). (e). E fa la'asaga i le taunu'uga o taumafaiga: Fuafua lelei. (Plan purposely) ma le Tatalo, (Prepare prayerfully). Fa'agasolo ma le mautinoa, (Proceed positively). Tuliutuiloa ma le onosa'i, (Pursue persistently).

UPU FA'AI'U: O fautuaga uma nei ua leva lava ona tatou fa'alogi i ai ma iloa lelei. Ma e na ona toe fa'amanatu pea i nai tupulaga ina ia fa'aaogaina ma le tataua ia fautuaga aogā ma le tāua. Tele ni avanoa ua vale tu'ulima, ona o le lē ola magafagafa, sauniuni ma tapenapena. O le isi foi lea fa'ailoga o le ola fa'amauualuluga o tupulaga, ma ua alia'e mai ai le anoano o fa'afitauli iā i latou i nei aso, ma ua tu'ua'ina ai lava i latou. Fa'amata o le fa'amauualuluga po'o le valelea ea? Fai atu ai foi.

FA'ATINOGA O LE FA'ATALATALANOAGA:

1. O le faiga masani lava o le fetufa'ai ma le Autalavou.
2. E lelei foi ae fesiligia muamua i latou i le uiga o le ulutala i lona vaega muamua mo lenei afiafi.
3. Ia fa'atulaga le Autalavou i tausaga mai le laiti e o'o i tagata matutua, ia manino ai o latou manatu ma le 'ese'esega o tausaga.
4. Fa'amolemole ia fa'atāua uma manatu o le mafutaga e fuafua i ai le fa'amatalaina o nai fesoasoani ua tu'uina atu.
5. Ma'ea lea, ona aga loa lea e matuā fa'asoa fa'alau'aitele manatu o i latou ua tu'uina atu e momoli ai se feau tāua mo i latou i le tāua o le **ola sauniuni** mo lenei Aso Sa.
6. Manatua e fa'auau i le vaisao fou i le mataupu o le MITAMITA VALE.

MANUIA LE FA'ASOA O LENEI AFIIFI.



**ASO SA –MATI 08, 2026. “FA’ATALATALANOAGA FA’ALUAITELE (Fa’aaauau)
MATAUPU – “NOFO SAUNIUNI MA LE MITAMITA VALE”
SINI TULIMATAINA: “O LE MITAMITA-VALE”**

FA’ATOMUAGA: Ua ma’ea ona tatou fa’asoa faalaua’itele i nisi o mafauauga ma manatu, e lē gata o i tatou lava ma lo tatou ola ai i lo tatou atunu’u, ae ua fesoasoani mai foi nisi ua iloga lo latou atamai e fautuaina ai i tatou tupulaga i le tāua o le ola sauniuni, auā o le olaga o lo o tatou ola ma soifua ai, o le olaga faimalaga. O le lalolagi e ta’avili pea i luma ma agai atu i le lumanai. E mavae aso ma tausaga, ae oo mai tausaga ma aso, e mou atu faiga ae tatou feiloai ma suiga. O le ala lea e matuā tāua ai lo tatou nofo sauniuni ma tapenapena e fetaia’i ma galu o suiga o le olaga. Taofi ua maua se fiafia i lea mataupu ina ia tapena ai pea tatou tupulaga mo le lumanai, auā e leai lava se isi malosili e manuia ai le olaga faimalaga o faia nei nai lo le saunia lelei ma mataala, tapenepena fa’atasi ma le Atua le ta’ita’i mala malaga silisili ma le fa’asino ala fa’atuatua e saogalemu ai malaga uma. Manatua, e fa (4), lava mea mo tatou tupulaga e pei ona tu’uina atu e amata tapena ai le malaga mo le lumana’i manuia o so’o se talavou.

Ae alo maia o le vaega mulimuli lena o le fa’atalatalanoaga fa’alaua’itele mo si mataupu e pei ona tu’uina atu. Ia i ai le Agaga o le Atua e fa’afiafia ma tatala o tatou loto i mafauauga fa’ale - agaga e iloa ai le loloto ma le tāua o le fa’asoa o fai nei. O le mataupu o lena afiafi, o le **“Mitamita vale”**

O NAI MANATU MAI I Ē ATAMAMAI E FETUFA’AI AI MA FESOASOANI AI I LE MATAUPU”

MITAMITA VALE:

O le ā se uiga faigofie o le upu mitamita vale? Atonu e faigofie pe ā fa’apea, ... o le mitamita lava ia e mafai ona tatou va’ai i ai i sona itu tāua ina ua tau i manū se fa’amoemoe po’o se taumafaiga ua fa’ai’uina i le manuia, ona lagona lea o le mitamita loloto i totonu o le loto, le ala lea e alagaina ai le fa’afetia ma le fa’amalō i le loto maulalo i luma o le Atua, auā ua tatou talitonu i le fa’atuatua, o le Atua le afuaga o manuia uma. O le mitamita la, o se lagona e tupu ae i totonu o le loto ina ua fa’amalieina i le taunu’uga o se fa’amoemoe, e ala ai ona mitamita fai a’e le agaga o le tagata. Aemaise o le mautinoa, se’i fa’amanūina le suafa o le Atua e ou manuia. O le mitamita lea a le tagata fa’atuatua, e na o Iesu Keriso lava e ao ina vi’ia.

Peitai, ua manatu e tau tata’i le fa’atalatalanoaga i le upu **mitamita** ina ua fa’aopoopo i ai le upu **vale**, auā o i’ina lea ua afua ai le tele o fa’afitauli ua tu’ua’ina ai lava tupulaga, ma e foliga mai ai ua fai ma vaisū a isi tupulaga ma ua tauau ina le ma taofia. Ua lē mitamita i le Alii, a ua mitamita i le mimita a le vale. Lona uiga ua lē atagia se fa’afetai ma amioga tusa’afia, a ua aliali mai amioga a le tagata valea. O le mimita ma le mitamita vale, ua fa’amatalaina i le upu fa’aperetania o le **Pride**. E lē leaga le pride i le tagata auā o inā e tupu ai le agaga fa’agae’etia ma le fa’afetai silisili mai le loto fa’amalieina moni. Peita’i, ua fa’aogaina e nisi tupulaga i se auala sesē lava ua fete’ena’i ai ma le ola tusa’afia i luma o tagata ma le ola fa’apaiaina i luma o le Atua. Aisea? ua leai se laina e gata ai le pride, a ua sosopo loa i le mālo vale ma le lē mafauau nauā, ua alu le tapasāina le olaga, ma ua ta’uleagaina ai le igoa ona o le amio mataga.

MITAMITA VALE (Pride)

Ua fa’amatalaina i upu nei, loto fefete, fa’amaua, fa’asausili, loto fifiti, lē fia to’ilalo, faumalo, fia tama/teine toa, ma isi lava uiga pa’a’a fa’apena. O le fa’anoanoaga i ia uiga ua ta’atele i nisi o tupulaga,

“ua matuā fete’ena’i ai ma le fa’a - amuia a Iesu i e loto maulalo, agamalu, fa’atupuina le filemū, amio solia, tausa’afia, ma isi amioga lelei uma ua fa’a - amuia mai ai le Alii i le tagata.

FA’ATAOTO – 11: 2. “A sau le fa’amaualuga, ona sau ai lea ma le ma, a’o i ai le poto i e fa’amaualalo”

“Afai ua e amio fa’avalea ina ua e fa’amaualuga, afai foi ua e manatu i se mea leaga, tu’u atu ia lou lima i lou gutu” (Fa’ataoto – 30: 32)..... (Cover your mouth with your hand in shame). E lelei foi ae faitau le Fa’ata’oto – 16: 18 – 19, ua tatou masani ai. “E muamua le fa’amaualuga i le malaia, e muamua foi le loto fa’asiasia i le paū. E lelei ona maulalo o le loto fa’atasi ma e ua agamalū, ae leaga ona tufa le vete fa’atasi ma e fa’amaualuluga.”

1. BENJAMIN FRANKLIN:

“O le tagata fa’amaualuga, e inuti i le taeao i le tele o mea, e ‘ai i le afiafi i le mativa, e inuti i le po i le maasiasi.” (Pride breakfasted with plenty, dined with poverty, and supped with infamy). Ua fa’amonía leni fuaitau poto i le tele o taimi, i le tele o tupulaga ma tagata i tupulaga uma. E manatu foi atonu e sili atu ona sa’o i o tatou foi tupulaga ma nisi o tatou tagata. Aemaise lava tupulaga ma tagata e vave ona sao i ulu le mimita ma ua fulitua ai i le Atua. E pei e feula ese e se afa malosi le tamāoaiga, ae tūtū ai ma le maasiasi.

2. CHARLES SPURGEON:

“O taimi e te iloa ai ua e maua le loto maulalo, ua nimo ese ai. O le loto maulalo, o le faia lea e le tagata o lona lava fa’ataata tonu” (When you know you have got humility, you’ve lost it. Humility is to make a right estimate of one’s self). Talofa e, oka, oka e, to’atele tupulaga o lo’o fēamoa’i solo pusa lotomaulalo, a’o lae lava e taofi ma fa’apea i latou o lo’o malu pea i totonu si loto maulalo, ae leiloa ua matuā tumu i amioga leaga ‘ese’ese ma tu’inauga o le olaga nei. Ua foliga mai ai ua loto maulalo foliga ma fa’afoliga amio i luma o tagata, a’o si’usi’u, ua na o amioga e mata’utia le matagā ma le to’ilalo popo i le soifuaga, ma fa’alumaluma ai matua ma aiga, faifeau ma ‘aulotu, nu’u ma le Ekalesia.. Ua tupu tele ai le mapuna a’e pea o le mimita vale lē fa’atuāo’ia ua ta’uvalea uma ai tagata. Manatua, na sili atu foi ona to’atele Faresaio na sili atu le pepelo i le mataupu lea i taimi o Iesu, aemaise lava ina ua filogia ma le fa’apolokiki. Taofi mau le lotomaulalo e fa’aeaina ai i le manuia o le Atua, ma tausa’afia ai i luma o tagata.

3. DWIGHT L. MOODY:

“Ia e loto maulalo, po’o lou pāsasa i lalo” (Be humble or you’ll stumble). O le a’oa’oga a Iesu, a e fia muamua, ia ave ma mulimuli, a fia sili, ia fai ma auauna, a fia saofa’i i le nofoa o le matai, ia ave le apavai fafano ma le solo. E aogā mo tupulaga mimita vale ma le malo vale fa’amaualuluga, ae tua i le matagā ma le ta’uvalea. O fea e sili iā te oe le tama ma le teine talavaou, pe afai o maua oe i le fa’amaualuga ma le mitamita vale. O le loto maulalo, po’o le pa i lalo o le papātua i le eleele. Tupulaga, sui le faiga o lau mālo vale.

4. VERN MACLELLAN:

(a). “O le mimita vale e mama’i ai uma lava isi tagata, vaganā ai lava oe” (Pride is the only disease that everyone around you suffers from except yourself)” (e). “Fai ma folo lou mimita vale, ona e mafanafana lea, auā o le mea’ai lea e 100% le lei o ni kalari” (Swallow your pride occasionally, and console yourself with the knowledge that it is 100% calorie free). E lelei foi lea fautauga mo tupulaga i le mataupu lava o le mimita vale. Ae a sia fautuaga mo e mama’i i le

gasegase o le suka ma le toto maualuga ma isi ma'i ua so'ona inu ai fuāla'au e pei o le tusitala o le nei mataupu. Fai atu ai foi!!!!

(e). O le fofō mautiloa o le ola fa'amauualuga ma le faitogafiti leaga, o le asiasi lea i le fanua tanu, o lo'o tutusa pau ai le 'au ulu susū, ma le 'au ulu mālo." (A sure cure for conceit and pride is a visit to the cemetery, where eggheads and boneheads get equal billing). Ua leva ona iloa e tupulaga mitamitavale ma tagata fa'amauualuga le moni o lea mea. E iloa fanua tanu ma tu'ugamau, peita'i, e gata le va'ava'ai i ma'a fa'amanatu o tu'ugamau, ae le o'o ifo i totonu i ponaiivi mamago o lo'o i totonu o tu'ugamau. O le fesili mo tupulaga, **Fa'amata e te iloa, e iloa e le oti ni tulaga o ni tagata?** (Sina fa'asoa pu'upu'u i si fesili lenā). **Tupulaga, ia mautiloa lenei mea moni, e maumau vale lou malosi i le mitamitavale po'o le mimitavale aemaise le fa'amauualuga, o le mea ua mautiloa, e tutusa lava le i'uga tatou te va'aia mo tagata uma, o le tu'ugamau.**

UPU FA'AI'U:

O mea lava ia mautiloa tupulaga. E lē fa'atalia i tala atu o le tu'ugamau lo tatou iloa o le 'ese'esega o le mimitavale, fa'amauualuga, fa'asausili, loto fefete ma isi uiga matagā uma, ae tatou te iloa lava i'inei. E lē mafai e mea 'ila'ila o le olaga nei ona fa'alafiina lenā 'ese'esega. E lē tanumia foi e le paō ma le pisapisao o mea tagitagi, e lē mafai lava ona punitia ai le tula'i matilatila o lea fete'ena'iga i lalo nei. Peita'i, o le tala a Paulo, e nenefu lava la tatou va'ai i'inei, ae o'o mai le aso tatou te iloa tino ai, e pei ona iloatinoina i tatou. O le fa'ataoto foi iā Lasalo i le fatafata o Aperamo, ma le mau'oa o lo'o fa'ataiō mai le afi, e lē se fa'amata'u lea tupulaga i e ua fa'amanuiaina i le tamāoaiga i'inei. (e lē leaga pe sesē le maua o le 'oa auā e tāua.) **Ae ao ina malamalama lelei tupulaga, e lē o le 'oa na agaleaga iā Lasalo, a'o le tagta e ona 'oa (mau'oa).** Na manatu maualalo i si taule'ale'a papala e le'i agava'a e ulufale atu ma ona fa'alētonu i le potu taumafa o le alii mamalu loto fefete.

Tupulaga, e lē o le isi mafu'aga ua faitiaina ai pea tatou, o le ā pei o se gasegase le saosaoa o le loto fefete ma le va'ai maualalo, o le fia show ma le fia ta'uta'ua i mea mataga ma mea valea, ua fa'asolo atoa ai le lē mafaufau ma le ola so'ona fai fa'alialia vale i nofoaga faitele, ae ta'uvale ai matua. E leai se fa'amoemoe o a'afia uma tupulaga i se manatu, ae mo tatou tupulaga o lo'o fa'atamala i le vaivaiga lea, e lelei ona manatunatu i le i'uga. Ia mau'oa i le agaga, ona mautiloa lea o le tumu i manuia o le tino, e o'o atu i le manuia e fa'avavau.

MANUIA LE FA'ASOA, MALO LE ONOSA'I

ASO SA – MATI 15, 2026 “SU'ESU'EGA I LE TUSI PAIA”

MATAUPU – “O LE FA'AUGAINA O LE FA'ATUSA O LE ATUA” (Image of God)

TUSI FAITAU – KENESE – 1: 26 – 28; 5: 1; 9: 6.

SINI TULIMATA'INA – Fa'amoemoe ia ma'ea ane le mataupu o le nei afiafi, ua malamalama tupulaga i se fa'augaina faigofie o le nei mataupu tāua, mo lo latou ola tutupu pea i le fa'atuatua i le Atua.

SINA FA'AMATALAGA E UIGA I LE MATAUPU:

E matuā tete'e le Tusi Paia ma lotu Iutaia i le faia o se fa'atusa o le Atua, e pei ona i ai i le tulafono e lua (2), o tulafono e sefulu i le Esoto e 20 ma le Teteronome e 5. E fa'asā ona faia ni fa'atusa po'o se

fa'atusa o le Atua. (YHWH), po'o nisi foi atua. E ala ona fa'asā ona faia ni fa'atusa o le Atua (YHWH), ona e lē mafai.

AISEA UA LE MAFAI AI?

O le mafua'aga ua lē mafai ai ona fai se fa'atusa o le Atua, **“ona o le ā fa'apumo'omo'o ai e le tagata le sa'olotoga o le Atua, ma faia ai foi e le tagata tuāo'i o le pule aoao a le Atua i mea uma i le lagi ma le lalolagi”** O le mafua'aga lenā e te'ena ai ma fa'aleaga ai e aganu'u fa'a – Teuteronomie, ma agan'uu fa'a-perofeta ni tupua, po'o ni fa'ailoga, p'oo ni ata fa'atusa e tau fa'atusa ai le Atua, pe fia tautāva ai i le Atua.(Esoto – 34: 13; Teuteronomie – 7: 5; 16: 22). O le mea foi lenā na matuā inosia ai le fa'atusa o Nepukanesa e pei ona i ai i le Tanielu mataupu e 3.

FESILI E FA'ASOA AI - Ae fa'apefea la ona sa'o le tala a le Kenese i le foafoaga i lona fa'apea mai, na faia le tagata (Atamu % Eva) i le fa'atusa o le Atua, e pei ona i ai i le Kenese 1: 26 – 28/ 5: 1/ 9: 6?

SINI FESOASOANI MO LE FESILI:

E ui lava ina na o le fa'atolu ona tāua lenei mataupu i le Feagaiga Tuai i le Kenese, ae i ai lava le tāua o le mataupu lea i le toe fafaguina i tupulaga le tāua o lona fa'auigaina o talitonuga fa'amataupu silisilli ma le 'oa o ō tatou talitonuga faavae ia, ina ia maua'a pea i le Tusi Paia.

E tāua le Kenese 1: 26 – 28, auā o lo'o fa'aalia ai le tulaga 'ese ma le maualuga o le fa'aeaea a le Atua I le tagata ola na ia faia, mai isi meaola, ma mea uma na faia. E tulaga 'ese ona o le faia o le tagata i le fa'atusa o le Atua, ae e foliga foi i le Atua. Ia iloa le mea lenei e tupulaga, E lē o fa'ailoaina mai po'o o le ā tonu foliga o le Atua ua faia ai le tagata ia foliga i ai iā te ia. Atonu e i ai se mafua'aga tāua ua lē fa'ailoaina ai lea tulaga. Ae e mafai ona maua se fesoasoani pe a o tatou mafaufau fa'apea tupulaga – ***Na faia e le Atua le tagata ola ma tu'u i le lalolagi o meaola ma nisi mea uma na faia, e molimau i le pule tutasi a le Atua, ma tausia ma leoleo mea a le Atua i le suafa o le Atua. O lona uiga o le tagata o le sui va'aia o le Atua, e galue fa'asui pule i le suafa o le Atua.***

FA'AUGAINA O LE FA'ATUSA:

O le fa'atusa e masani ona fa'aaogā e le ituaiga fa'auigaina lea e fa'apea. O se tupu o se malō tele na te faia ona fa'atusa (fa'a-tagata), ona fa'atutū lea i vaega 'ese'ese o lona malō e lē mafai ona ia pulea uma, ona e lē mafai ona i ai ia i ia vaega i aso uma ma taimi uma. O le fa'amoemoe o lea faiga, o le ā avea ona fa'atusa ua faia e fai ma ona sui va'aia, ma fa'amanatu i tagata o lona malō, o lo latou tupu moni latou te lē o va'ai i ai i aso uma. O lona uiga ua tu'u i le tagata ola i le lalolagi ma le foafoaga, ina ia fa'ailoa ma fa'amanatu i meaola uma, ma mea uma, le pule fa'atupu to'atasi a le Atua. O le uiga lenā o le matu'upalapala a le tagata mai le Atua, na faia ai o ia na te fa'ailoa le pule aoao a le Atua, ma fa'atino foi le pule tausi mea a le Atua, ua lē mafai ona va'ai i ai i isi meaola ma mea uma o le foafoaga.

UPU FA'AI'U

Tupulaga, o le uiga lea o le fa'atusa o le Atua tatou te iloa ai le pule silisili 'ese fai to'atasi i mea uma o le foafoaga e aofia ai ma le tagata, Amuia i tatou ua to mai e le Atua lo tatou matu'upalapala lea, e fai i tatou ma tausi mea ma leoleo o lana foafoaga atoa, i le suafa lava o le Atua. Tatou te galulue ma va'aia le foafoaga, ae gaoioi fa'asui pule i le suafa o le Atua ma lana ta'ita'iga. Le uiga lea o le fa'atusa o le Atua, o le fa'apuga ua fa'aaogā e sami ai (celebrate) ma fa'amalosia ai le tāua o le mamalu (dignity) ma le pule (authority) a le tagata ola, i lona tulaga i lalo ifo laititi o agelu (Salamo 8: 5 – 8). Ua fai le tagata ola ma soātau o le Atua na te tausia ma va'ava'aia ma leoleo mea uma na faia e le Atua. O le

manatu pito tāua lea, ia fa'amamafa i tupulaga. O le fa'atusa o le Atua na faia ai le tagata ia foliga i le Atua, o le meaalofo a le Atua mo le tagata ola. O le meaalofo ua mafai ai e le tagata ona mafuta ma le Atua – mafuta, ma maua ai e le tagata lona matu'upalapala na te pulea ma tausia lelei ai mea a le Atua, i **le suafa e toatasi o le Atua**

FA'ATINOGA MASANI:

1. Ia fetufa'ai fa'atasi le Autalavou pe vaevae foi i ni vaega, ma saili ni o latou manatu e fa'ataatau i le fa'auigaina o le fa'atusa o le Atua.
2. A ma'ea ona fa'amalamalama lea o le mataupu i si fa'amatalaga pu'upu'u ua tu'uina atu. Fa'amolemole o lo'o i lau Susuga a le Feagaiga le atoa e fa'aatoa ai le fa'amalamalamaina o le mataupu.
3. Ia taumafai e fa'afeso'ota'i le mataupu ma ni mea tāua o lo'o tutupu i le olaga, aemaise lava o mea e feso'ota'i lelei ma le olaga o tupulaga i nei aso, ina ia a'oa'oina ai i latou.

MANUIA LE AFIIFI, MALO LE ONOSA'I



ASO SA – MATI 22, 2026 “SU'ESU'EGA I LE TUSI PAIA”
MATAUPU – “O LE ALA I LE SATAURO O LE ALA I PUAPUAGA”
TUSI FAITAU – MAREKO 10: 32 - 34

FA'ATOMUAGA –

E i ai lava le talitonuga ua laulauvivilu le tupulaga i enei vaitau tāua o le savaliga a le 'au fa'atuatua Kerisiano uma, i le aga'i atu o Iesu i lona maliu. Peita'i, e lagona pea le ofo alofa i le Alii Fa'aola pe afai tatou te manatu ma mafaufau loloto, iā i tatou tupulaga ma a'afiaga o lo tatou olaga i le lalolagi ma mea ua tutupu ai. Ua fesoāaina le fa'atuatua auā e foliga mai ua māmā le va'ai a le atamai fa'aona po nei i le alofa fa'amaoni o le Atua i le tagata ina ia le fano i le agasala. Ua maitauina foi le foliga mai ua na o se tusi pei o isi tusi le Tusi Paia. Ua fa'atalalē ma fa'atamala i ai le to'atele o isi tupulaga. Ua lē faitauina le Tusi Paia o se vaega o lo latou olaga. Ua i ai foi le talitonuga ua manatu nisi tupulaga o le Tusi Paia, o le mea lava e tasi tala uma ua i ai. O le ala foi lea ua manatu ai e fa'atāua pea ona fa'amanatu i tupulaga o le tatou Ekalesia, le tāua tele o le vaitau lenei na fa'atino ai lo tatou fa'aolataga ona o le fa'amaoni o le Atua i ana folafolaga, ina ia tatou maua le ola ma maua atili pea lava, aemaise le manuia e o le ola e fa'avavau. Ta'oto ia po'o le ā se lagona ma le fa'alogo a tupulaga i tala tāua ia, pe ua pasiā i la latou fa'alogo pe ua lē fia fa'alogo foi i ai, e i ai lava le naunauta'iga, ina ia tatou fa'amalolosi pea e ta'u i tupulaga, o tala o le Tusi Paia, o tala e ola pea lava pea, e fou pea i aso uma ma taimi uma, e augātupulagā lava. A'o le fa'amoemoe tāua lava, ia lagaina pea mafaufau o le tupulaga ina ia manatua le Atua ma lona alofa ua aeae ai i manuia o le tino, mafaufau ma le agaga. O le ala lea na folafolaina ai lave e le Alii i ona so'o, o le ala i le satauro o le ala lava o puapuagā e o'o i le oti ae le'i fa'afiti ai o ia.

SINA FA'AMATALAGA PU'UPU'U O LE MATAUPU:

Ua o'o i vaitau o puapuaga o lo tatou Alii Fa'aola tatou te mafaufau toto'a pea i ai ma le alofa. E pei ona lagonaina e Iesu le mātuitui o ia tigā na o'o iā te ia, peita'i, ua lē mafai lava e ia tigā mātuitui ona taofia o ia i lona alu atu i lona lava nu'u o Nasareta, e ui ina te'ena pea o ia. O Nasareta o le isi lea nu'u e fai mo latou a'ai Ierusalem. E moni lava foi na fanau Iesu i Petele'ema, a'o Ierusalem lava le laumua o Nasareta. E ui lava foi ina amata le galuega i fafo atu o Ierusalem, a'o le fa'amoemoe tupito o Iesu, e

fa'ai'u lava i Ierusalemā le a'ai e fetaia'i ai ma tigā mātuitui o lana galuega fa'aola mo le lalolagi. Manatua, ua logologoa tala'ave o Iesu i lana galuega, o ana a'oa'oga, vavega ma fa'amalōlōga. I le manatu la o tagata Iutaia, ua matuā uiga ese le mea ua latou iloa iā Iesu, ua matuā ofo ma segia o latou māuli, pe a fua i so latou Mesia malosī i taua o lo'o tatali pea i ai. O le ala lea o lo latou ta'upulepule ua tatau ona fai se i'uga o Iesu, ae lē faia lava i se isi nu'u, e fa'ataunu'u lava i Ierusalemā.

Na silafia lelei e Iesu le mea o lo'o taupulepule i ai tagata, ae e le'i fa'afiti pe solomuli ai lava. Na ia manatu e leai lava se isi auala e fa'aalia ai lona fa'amaoni i lona Tamā ma lana galuega tala'i i le fa'aolaina o le lalolagi o tagata agasala, e pei o le alu pea i Ierusalemā. O lea na ia fetalai atu ai i ona so'o, o le ā tatou aga'i atu nei i Ierusalemā, o inā o lo'o ta'oto ma fa'atali mai ai le taunu'uga o la'u galuega. O lo'o fa'atalitali mai ai i latou o e latou te fa'atigāina ma fasioti iā te a'u, ae ou te lē toe foi pe fefe ai. Auā e ao lava ma tatau ona fa'ataunu'uina le galuega na ou sau ai e fa'atino, e ui ina asa i puapuaga. O mea uma lava ia na fetalai atu ai Iesu i ona so'o i ona puapuagā ma lona fa'asalaina na taunu'u uma lava, e pei o le sasa, feanu, tauemu, o le po, ae fa'ai'u i le fa'atautau i le satauro.

UPU FA'AI'U:

E ui ina silafia e Iesu e faigatā le ala i le satauro, ae na malie lava i ai e fa'atunu'u. Na ia silafia faigatā ma puapuagā o lo'o aga'i atu pea i ai, ae le'i fefe pe fa'afiti ai, auā o lona alofa ma lona usiusita'i atoatoa i lona Tamā e fa'ataunu'u le galuega na 'auina mai ai o ia. To'atele tupulaga e alu atu loa e fetaia'i ma mea faigatā, musu loa ma togi le solo ua lē fia i ai, Ua fa'atonu mai e Keriso le ala o le manuia ma le fa'aeaina, o le usiusita'i ma aua le fefe pe fa'afiti e fetaia'i ma faigatā ma puapuagā o le olaga, auā e leai se mea tatou te maua ma le filemū. A'o le Alii lava ia, na ia silafia mamao le ala e matuā mamafa tu ona tigā e tau i le oti ae le'i fa'avaivai ai.

O le feau lea ma le fa'amalosī mo tupulaga i lenā Aso Sa o le Laupama. O le ala i le fa'aeaina ma le manuia e fa'avavau, e tatau lava ona ui i puapuagā ma faigatā o le olaga. E tatau ona onosa'i ma alu pea ma le fa'atuatua i le Atua le ta'ita'i sili. E lē o toe mana'omia i aso nei le fa'alialia vale ma le mōlovale i le olaga, auā e i'u vale ma matagā. Aua le maimauina le olaga i mea valea ma inosia, e lē o se lototele fa'a- Iesu lenā, ae mafai ona ou fa'apea atu, o le lototele fa'avalevlea, o lona i'uga foi e lē fa'aeaina ae inosia ma ta'uvalea. E lē maua ai se manuia lava e tasi, ae ua na o le oti ma pologa ai i le agasala.

Tatou manatunatu filemū i lenā vaiaso tāua o le fa'atuatua i le Atua, Tatou 'auai fa'atasi ma ia e asa fa'atasi le ala i le satauro, e ui ina tigā ma mamafatu, ae tatou o pea fa'atasi ma ia. O lona onosa'i i le ala lea, ua tatou manuia ai i lona toetu e fa'avavau ma fa'aolaina ma fa'amagaloina ai i tatou uma. Tupulaga, aua le fia tama pe a pala'ai e amo le satauro o Iesu. Amuia oe pe afai e te mafaia.

MANUIA TELE SAVALIGA O PUAPUAGA O LE ALII

ASO SA – MATI 29, 2026 – “ASO SA O LE LAUPAMA”

MATAUPU – “LAUPAMA I SAMOA NEI”

TUSI FAITAU – Luka- 19: 28 – 40; Mareko – 11: 1 - 11

FA'ATOMUAGA: E lē mafai lē mafai lava ona tatou suia tala o le Tusi Paia. Auā o le upu mai le vavau e o'o i le fa'avavau. Ua lē toe pogisā foi le 'au fa'atuatua i lea tala o le fa'aolataga. O gaioiga ma taga o lea aso ua molimau i ai le a'u fai- evagalia, ua i ai le taofi ua matuā manino ma malamalama lelei i ai tupulaga ma tatou uma. Peita'i, o le fa'amoemoe lava o le a'oa'oina pea o lea tala ina ia matuā nofo fale

i a'ai o loto ma mafaufau o tupulaga, le ala na tatou maua ai le fa'aolaina ma le fa'amagaloina o tatou agasala e le Atua alofa. Ae le gata Iea, ia a'oa'o ai la tatou savaliga ma tupullaga ina ia mautinoa lo tatou savavali e tusa ma le finagalo o le Atua. E tumau pea afioga a le Atua, peita'i, e fou pea a'oa'oga ma lapataiga mo i tatou aemaise tupulaga mai lea taimi i lea taimi. O le mea lea tatou te iloa ai, o afioga a le Atua o afioga ola ia mo le tagata i le ola e fa'avavau.

Ua manatu ai, mo lenei afiafi, e lelei ona fa'atalanoa le Autalavou i ni o latou manatu, aemaise se fa'atinoga o le malaga fa'atupu a Iesu, i se va'aiga mai totonu lava o si o tatou atunu'u o Samoa.

FESILI FA'ATUPU MANATU

1. Fa'amata o ā ni tapenaga a'o a foi ni lagona o tagata Samoa pe ana fai o Iesu lea o le ā malaga asiasi mai i lo tatou atunu'u?
2. Pe ana fa'apea o Iesu o se Samoa ua afio mai I lona nu'u, o le ā se lagona o tagata i le fa'ataliina o ia?
3. O ā ni leo o le ā alalaga ai tagata?

FA'ATINOGA O LE MATAUPU – (Ia vaelua le Autalavou i vaega e lua)

VAEGA MUAMUA:

1. Filifili se Tusi Faitau e fa'atino ai le fa'amoemoe, po'o le tu'u fa'atasi foi o tala e lua.
2. Ia fa'atino e le vaega 1 le malaga I le fa'agasologa o lo'o fa'amatalaina mai e le Tusi Paia, e filifili e latou se Evagalia e fa'atino ai.
3. Ia tautuanā ia fa'aaogā pea upu o le Tusi Paia, ma le fa'asologa e pei ona i ai i Evagalia.
4. Ia fa'asolo lelei mai le amataga se'ia o'o i le taunu'uga o le malaga i Ierusalem.
5. E lelei ae fa'aaoga la'ei o na atunu'u e fa'atino ai.
6. Ou te iloa e leai ni asini i lo tatou atunu'u, ua lē afāina lea, ae fa'aaogā pea le faiga ua tatou masani ai i le vaega lea.
7. Ia i ai uma mea faitino o lo'o ta'ua i le tala e fa'aaogā mo le fa'atinoga.
8. Ia matuā fa'amalosi i tupulaga, ia fa'atino ma manatunatu i le latou vaega o lo'o fa'atino mo le fa'asoa mulimuli ane.

VAEGA LUA:

1. Ia manatunatu lelei i ni faiga ma aga, o la'ei ma fa'atinoga a Samoa i le fa'ataliga o se tupu e o'o mai i le atunu'u.
2. Latou te fa'atinoina le malaga fa'atupu i se va'aiga mai totonu o Samoa nei.
3. Ia filifili pea o Iesu le tupu lea ua afio mai I lona nuu poo lona atunuu o Samoa.
4. Ia fa'atino gaioiga uma a le atunu'u i le taunu'u mai o lea malaga i Samoa.
5. Ia atagia teuga uma ma la'ei, aemaise o le aganu'u a Samoa i le fa'ataliga o lea malaga.
6. Ia atagia uma mea faitino e fa'aaogaina e le atunu'u mo lea fa'amoemoe tālia.
7. Ia fa'amalosiia tupulaga uma o le Autalavou ia maitau fa'atinoga e lua, ma ia matuā manino i le 'ese'esega, ae pe i ai foi ni mea e tutusa ai.

FETUFA'AIGA FA'AI'U:

1. A ma'ea fa'atinoga e lua, ona toe fa'atasi lea o le Autalavou mo le fetufa'aiga.
2. O le ā taoto atu lava i lau Susuga a le ta'ita'i i le a'ano moni o lo'o fia momoli mai e le mataupu o le afiafi.

- Ia tu’u le avanoa i tupulaga e fa’asoa ai ona fa’ai’u lea e se aotelega a lau susuga a le Fa’afeagaiga.

A’OA’OGA E TULIMATAINA:

- Ia momoli i tupulaga le lagona alofa i le afio atu o Iesu i Ierusalem, ma le fa’amoemoe tele ia fa’aolaina le lalolagi agasala
- Ia avea fa’atinoga ia matuā teu mau ai i loto o tupulaga le ala na fa’atino e Iesu, mai le maulalo e o’o i le fa’aeaina,
- Ia mautinoa le agaga alofa o tupulaga e ‘auai fa’atasi ai e tau’ave tigā o le Alii Fa’aola, e tau atu i lona maliu, ae fa’aeaina i lona toetu manumalō.

FA’AALIGA TĀUA:

Pe afai e talafeagai ma o gatasi ma sa outou fuafuaaga fa’ata’oto o le avaitau, (camp), manaia ae tu’u i ai le tatou mataupu lea, e fa’atino ai i totonu o ā outou polokalame. O le agaga mauuluga, ia matuā tapena lelei vaega e lua i tapenapenaga talafeagai, aemaise o la’ei ma fa’atinoga uma ina ia mafai ona aumai ai le agaga moni o lo’o tulimataina e le mataupu. E lelei foi lea e lava ai le taimi e tapena ai, ina ia ‘anoa i loto o tupulaga ma mau lelei le uiga o le tala i lona ‘ese’ese mai le Tusi Paia, ma fa’atinoga talimalo a lo tatou atunu’u i mea nei o tupu. E fautuaina ai se po o lelei o le vaitau lea e tapena ai ma fa’atino ai. E lelei foi ae vala’aulia le tou Ekalesia e tala a’ao atu e molimau la outou tapenaga.

MANUIA LE TAPENAGA MA LE ASO SA O LE LAUPAMA

//

**ASO SA – APERILA 05, 2026 “FETUFA’A’IGA I LE TUSI PAIA” (Aso Sa o le Eseta)
 MATAUPU – “O E TA’U ATU I ONA SO’O”
 TUSI FAITAU – MAREKO – 16: 1 - 8**

UPU TOMUA:

Sa tatou i ai i le vaiaso ua te’a i le malaga fa’atupu a Iesu i Ierusalem. Manatu lava ua suia ni lagona o tupulaga i fa’atinoga e pei ona taumafai atu ai si tusitala. Malō le onosa’i ma le fa’atoatoa. O nai motugā manatu lava e matimati ai le tatou galuega ina ia mamafī tupulaga i le fa’atuatua ma talitonu i le Atua, ae liliu ese i uiga to’ilalo a le tiapolo e fano ai le ola. Ua o’o atu Iesu i Ierusalem lona lava nu’u, o inā i lona nu’u na fa’asalaina ai o ia ma fasiotia. Fasiotia lava e aunoa ma se agasala. Fasiotia auā o lana molimau na molimau ai o ia, o le ta’u atu o le Alo o le Atua. Aemaise o lana fa’atinoga o lana molimau, sa fa’atino lava i ana a’oa’oga ma galuega ofoofogia na ia faia.

SINA FESOSOANI MO MATAUPU

- O lo’o ‘ese’ese pea le ‘au tusitala o le ‘au fai evagalia i le fa’asologa o ā latou tala o le toetu na liliuina ai e le Keriso le fa’anoanoa, fefefe ma le popole o le ‘au so’o, ina ua maliu le alii, ma ua leai so latou ta’ita’i. Aemaise o le popole ina ne’i te’i ua fa’asolo ane iā te i latou le fa’asalaga e pei ona fai i le Matai o le galuega.
- I le tala a Mareko, o lo’o ia fa’amamafaina le tu’ugamau tu’ufua. Ona o le uiga e lē o tāua tele iā Mareko nisi mau fa’amatalaga. Pau le mea tāua iā te ia, **o le tu’ugamau ua tu’ufua**, ma le tala ua ‘aumai ai, ua toe o Ia. O lo’o fa’amatalaina e Mareko le fa’alogo ma talitonu i galuega ofoofogia a le Atua. O le toetu o Iesu, o le mea moni na tupu i le talafa’asolopito o le fa’atuatua Kerisiano.

3. O lo’o i ai le fa’amamafa e pei foi o tala a isi o le ‘au fai evagalia. **“Ina o atu e ta’u i o’u so’o”** le molimau fiafia o le toetu. O le toetu la, e lē o se galuega tau fa’aofo, ae o le Atua o lo’o galue pea ma fa’aauau ona galue e lē malōlō. E pei ona ia liliuina lenei fa’anoanoaga tele o le ‘au so’o ma i latou uma na mulimuli ma talitonu atoatoa iā te ia. **Inā o atu ia e ta’u atu i ou uso ma tuafafine tupulaga, e moni ua toetu le Alii. E lē o se tala fatu, o le mea moni na tupu. E lē o se mea mālie i le fa’alogo, a’o le tala mo’i lava.**

SINA FAASOA I LE TUSI FAITAU

O le aso Faraile ua tea nei, o le fa’amanatuina masani lea o le fa’asatauroina ma le maliu o Iesu. A e o le mea ofoofogia e foliga mālie i le tala lea a Mareko, na ala usu lava fafine e asi le tu’ugamau ma fetautalatalaa’i po’o ai o i latou na te mafaia ona fulieseina le ma’a ai le gutu o le tu’ugamau. Ae na fa’ate’ia i latou i le taunu’u atu ua uma ona fuliese le ma’a, sa pupuni ai le gutu o le tu’ugamau. A’o le mea la e ofo ai fafine, latou te le’i vāai i se isi ua toetu a’e nai le tu’ugamau. Pau le mea ua latou va’aia ua matala le tu’ugamau, ae ua leai Iesu, ua na o taulele’a e t’oalua o lo’o o’ofu i ofu sisina o lo’o i totonu o le tu’ugamau. O i la’ua ia na ta’u ane i fafine le tala fiafia ua toe tu le Alii.

O le uiga lenā o le tu’ugamau tu’ufua, na aumaia ai le talalelei o le fiafia tele. O le mea tāua lea i le tu’ufua o le tu’ugamau, o le fa’ailoga lenā o le Atua e galue e o’o lava i le oti ma le tu’ugamau e lē malōlō. E lē gata ua aumaia se tala fiafia i le ‘au so’o ua toe soifua Iesu, ae o le tala o le olioli ina ua fa’atolaloina e Iesu le oti, le mea sa manatu Iutaia ma so’o o Iesu e gata ma uma ai le fa’amoemoe o tagata ola uma. Peita’i, o lea ua ta’u mai e Iesu, e i ai le ola i tala atu o le oti ma le tu’ugamau. E lē tatau ai ona toe fefe se Kerisiano fa’atuatua i le Atua i le oti, auā o lea ua manumalo a’ia’i le Tupu o tupu ma le Alii o alii. A’o le fa’amalosi lea mo ona so’o, ina ia o e fa’aauau le galuega ma molimau atu i le fa’aolataga a’le Atua i le lalolagi uma.

Semanū lava toe soifua ma toetu mai le Alii nai le oti, semanū e ta’ape le ‘au so’o, toe foi le tagata i lona aiga i le mea na sau ai, e pei o le to’alua i le ala i Emau. Ua toe foi i o lāua aiga ina ua maliu Iesu, peita’i, ina ua feiloa’i ma Keriso toetu i le ala, ona fa’amalamalama lea e Iesu iā te i lāua, o ia lea ua toe soifua mai le oti. Na pupula lea o lāua mata ma ua la mautinoa moni lava. Fai mai le tala, e le’i toe fa’atali ae ua taufetuli e ta’u i so’o ua toetu le Alii. O le mea e ofo ai i le tala lea, ua galo le vaivai o le ‘au so’o ina ua iloa ma le mautinoa le fa’aali i ai o le Alii toetu, auā o le mamao o le va o Ierusalem ma Emau e tusa ma le 7 maila. Ua tutupu lagona fou, ua lē lagona se vaivai, ina ua malamalama ma manino lelei i le Keriso moni ua toe soifua mai le oti.

O le afio ese o Iesu mai le tu’ugamau po’o lona toetu manumalō, o le ata atoa lenā o le amataga o mea fou, o le ola fou ma le fa’aolataga atoatoa mai le Atua. O le suiga o manatu fou, o mea fou, o fiafiaga fou, o galuega fou aemaise lava o le fa’amoemoe fou ina ua maua le tala, ua na o le atigi tu’ugamau tu’ufua, ua leai se Iesu sa tanu ai. I le fuaiupu e 7, fai mai i latou sa i ai i le tu’ugamau, **“o e ta’u atu i ona so’o.....”**. O le feau atoa lenā a’o fa’atalitali pe sa’o ma moni le tala ua toetu le Alii. Ina ia aua ai le toe fesili ae o loa e ta’u atu.. O lona uiga o le Atua e galue lava ia e lē fa’atali i se isi, ae galue lava i ana lava galuega i ona lava taimi i lona lava finagalo alofa. O lo tatou gaua’i atu i lenei tala moni ma le fa’amaoni, tatou te lagona ai le alofa ma talia le fa’aolataga a le Atua ua tatou manuia ai.

TOE MANATU:

Tupulaga, e lē fou la tatou fa’alogo i le tala o le toetu, ae fou pea feau ma aoaoga mo lo tatou olaga e saili atu ai i le manuia e faavavau. Avea i tatou tupulaga ma leo e matuā leotetele e ta’u atu le talalelei

fiafia o le toetu, i nisi tupulaga poo ni tagata o loo maua pea i le masalosalo. O le manumalō o Keriso i le oti ma le tuugamau, o lo tatou manumalō foi lea i le oti ma le agasala, pe afai tatou te talia ma savava li e tusa ma lona finagalo. E tāua lou taimi nei, auā a lelei lou taimi nei e mautinoa lou lumana’i manuia mai le Keriso Toetu. Manatua, o ananafi e fau ai le asō, a’o le asō e tapena ai taeao ma le lumana’i.

MANUIA TELE LE ASO SA O LE ESETA

ASO SA – APERILA 12, 2026 “SU’ESU’EGA I LE TUSI PAIA”
MATAUPU – “E USO LĒ TALITONU MA MASALOSALO”
TUSI FAITAU – IOANE 20: 26 – 29

FA’ATOMUAGA:

O le fa’amoemoe o lenei fa’atalanoaga, o le toe polili atili lea i tupulaga le tāua o le mautinoa o le fa’atuatua ua toetu le Alii. Ia leai se masalosalo pe tu u fesili i ni fa’amaoniga e pei o Toma, ae ia maua’ma mautinoa i le fa’atuatua ma le talitonu moni i mea ua fa’aalia ma a’oa’oina mai e afioga a le Atua ua tatou fa’alogo i ai. O le fa’amoemoe lava lea o le fa’amanatu pea ma talanoa pea i le toetu o Iesu, ina ia malamalama tupulaga ma tatou uma, o le talitonu iā Iesu Keriso ua toetu mai le oti, e lē fa’atalitali pe fa’alagolago i mea ua va’aia po’o se fa’amaoniga o ia mea, a’o le loto usiusita’i i le fa’atuatua ma talitonu i le Atua fa’aali mai.

SINA FESOASOANI MO LE MATAUPU:

1. I le amataga o le mataupu lea e 20: 19 – 25, o lo’o ta’u mai ai, e le’i i ai fa’atasi Toma ma le ‘au so’o ina ua fa’aali tino le alii i le mafutaga a le ‘au so’o. Peita’i, ina ua fa’alogo Toma i le molimau a le ‘au so’o, sa lē talitonu lava o ia.
2. I le manatu o Toma, e tataua lava ona i ai ni fa’amaoniga o le Keriso toetu lenei, o le Keriso lea sa fealua’i i Kalilaia. O le manatu lea o Toma, e lē taulia fa’amatalaga, na te lē taliaina foi ni tala fa’alogo, se’i loga lava e va’ai tino i ai ona mata, ma tagotago i ai i le tino o le Keriso i mea na tutu’i ai fao ma le itu na tutu’i i le tao. Ua matuā lē manatua lava e Toma a’oa’oga ma fetalaiiga a le Keriso e ala i lana fa’aolataga.
3. I le tasi Aso Sa na soso’o ai, ua toe fa’aali foi Iesu e pei ona ia fa’aali i le Aso Sa muamua. E lē gata la o lona fa’aali i le tino, ae ua ia fa’aali tino foi iā Toma fa’ailoga ma fa’amaoniga o lo’o ia pulunaunau i ai. O ona lima ma ona vae ma lona itu na tutu’i i fao ma le tao.
4. E tusa ai ma le molimau a Ioane, ua sau lava ma le fia talitonu Toma, ae na fa’amaonia ai lava inā lona liliuina ina ua fa’atepa e Iesu i le mea o lo’o vaivai ai o ia. Ona ia ta’utino lea e monii, o Iesu lava lea o le Keriso. Ua fa’ai’uina i’inei le manatu o Ioane e uiga iā Iesu, o ia o le Keriso, o le Alii ma le fa’aola, ‘Le Alii e, ma lou Atua e.....”
5. Ua fa’aali manino mai e Ioane le mea tonu lea e tupu i lona vaiata, o le maoa’e o le poto ma le malamalama, aemaise le tele o tapua’iga ua saili i faamaoniga. Lea foi ua manatu ai Ioane, e lē mafai ona vaia e tupulaga Kerisiano fai a’e ma mulimuli mai pei foi o tatou, o lo tatou maua lea o a’oa’oga ma tala’iga mai le ‘Au Aposetolo. E ui lava la i lea, ae o le mea moni e ao ina talia i le toetu o Keriso, e a’o lava ina matuā talia i le talitonu atoatoa i ai. **O LE TALITONU** iā Iesu toe tu, e lē faalagolago i ni mea ua va’aia, e pei ona manatu i ai le ‘au popoto Eleni lea na sesē ai Toma Ae o le gaua’i ma loto atu i le upu a le Atua e ala i le talia i le loto maulalo ma usiusita’i i ai.

SINA FA'AMATALAGA O LE MATAUPU

O le tatou mataupu i lenei afiafi, o le toe tuliloaina lea o le tala i le manumalo o Iesu i le oti ma le tu'ugamau po'o lona toetu. Se'i o tatou talatalanoa atili ai i mea na tutupu mulimuli ane i nisi o le 'au so'o, aemaise le to'atele o tagata Iutaia ina ua pa le tala ua toe tu Iesu. O Toma la le isi so'o na lē talitonu i le tala lenei ina ua salalau ma ta'u atu i ai e ona uso, na fa'aali ane Iesu iā te i latou a'o toesea ai Toma. Na matuā te'ena e Toma lenei molimau i lona taofi, o se mea e lē tusa ai ma le gasinga o mea o le natura o le soifuaga lenei mea o le toetu o se tagata ua po tolu i le tu'ugamau. O le ala lea na tonu ai i lona manatu a lē va'ai tino o ia iā Iesu Keriso toetu, e lē talitonu lava. Ua ma vae aso e valu ua toe fa'apopototo fa'atasi le 'au so'o i le mea e tasi i Ierusalem. O inā na toe faaali ai Iesu na toetu iā i latou fa'atasi ai ma Toma saili i fa'amaoniga ma fa'aailoga. Ona fetalai atu lea o Iesu iā Toma, **“Aumai ia lou tamatama'ilima i'inei, va'ai mai foi i o'u lima...aua foi e te masalo vale, a ia e fa'atuatua”** E le'i tula'i ese Toma a ua le mautonu o ia, ina ua fa'aali tino i ai le Alii ma fetalai sa'o iā te ia. Ua na o le nofo ma ofo o lona loto i lenei mea sa manatu e lē tupu, peita'i, o lea ua ua matuā talitonu nei ma le atoatoa, o Iesu lea na maliu ua toetu moni lava. Fai mai si ona leo, **“Lo'u Alii e, Lo'u Atua e.”** Ona fetalai ane lea o Iesu iā Toma, Amuia i latou e lē va'ai mai, ae talito nu mai pea.

UPU FA'AI'U

O se fa'amanatu mo tatou tupulaga o aso nei, ua lu'iina pea lo tatou fa'atuatua ma le talitonuga i manatu 'ese'ese o le olaga televave ua tatou i ai. Ua tele foi taofiga ma manatu e fa'atatau i le Alii toetu. Ae tūa pea lo tatou taofi mau i lo tatou fa'atuatua ma le talitonu mausalī, e lē o se tala fatu le toetu ua a'oa'oina ai i tatou e le Ekalesia ma le Tusi Paia. Tupulaga, e sa'o lelei outou, o le olaga lenei se'iloga lava ua va'ai tino i ni fa'amaoniga ona fa'atoa talitonu lea ma talia. Peita'i, o tala i le galuega fa'aola a le Atua, e lē tau sailia ni fa'aailoga ma ni fa'amaoniga. Ua uma ona fa'atino e Iesu, lea na molimauina e i latou sa va'ava'ai tino lava i ai i le tu'ufua o le tu'ugamau. Ua a'oa'oina ai i tatou le 'au fa'atuatua tupulaga ina ia lē se'e 'ese lo tatou talitonu i le fa'amaoni o le Atua ma lana fa'aolataga.

E tūa pea le taugologolo ma a'oa'oina pea lo tatou fa'atuatua i le Atua e to'atasi lo taotu lavea'i sili, ua tatou manuia ai nei ma le aga'i atu i lona malō e fa'avavau. Fai mai Iesu iā Toma, **“Amuia e lē va'ai ae talitonu mai pea”** Ae ā tatou tupulaga o aso nei? O ai lenā e te talitonu i ai? Ae aiseā e te masalosalo ai pea i le alofa fa'amaoni o le Atua?

FESILI FA'ATUPU MANATU E FA'ASOA AI:

1. E sa'o le taofi o Toma pe a fua i fa'amasinoga fa'a - le malō o le lalolagi nei?
2. O le ā se feau fa'ale-agaga e te lagonaina i le tali a Toma iā Iesu?
“Lo'u Alii e, Lo'u Atua e...”
3. O le ā sou taofi i upu ia, 'aua foi e te masalo vale, a ia e fa'atuatua?
4. Aiseā e te masalosalo ai pea i le alofa fa'amaoni o le Atua?

Fa'amolemole ia fa'aopoopo ane e lau Susuga nisi fesili e saga fa'amlamalama ai tupulaga ia taofi mau lo latou talitonuga i le Keriso Toetu.

MANUIA LE FETUFA'AIGA



**ASO SA – APERILA 19, 2026 “AGANU’U” (E Fa’avavau aiga) (Fa’auau)
MATAUPU – “O LE MATAI MA SULI O LE AIGA” (Vaega 2)**

FA’ATOMUAGA:

Ua ma’ea ona tatou talanoa ma fa’asoa i le aoao tetele o le aiga potopoto ma ona nafa ma matāfaioi tausi e pei ona silafia uma. O le fa’amoemoe lava, ia maua e tupulaga o aso nei le malamalama’aga i vaega taulia o aiga, auā ua telē le suiga o le olaga, ae lē mafai lava ona suia ai fa’avae o le va nonofo ai o aiga Samoa. Fa’amalo le fa’asoa, fa’afetai le onosa’i, ua na o se fa’ama’ite vaivai a le tusitala ua aoaoina ma tufa atu, ae ua i ai le talitonuga o le ato’aga o lo’o iā outou Susuga, ma le ‘au faiupu o le atunu’u e mafai ona lagolago atu, auā le a’oa’oina o nai tupulaga mo lo latou tausi ma le manino i fa’avae o aiga. Ae alo maia, o le soso’oga lea o le tatou fa’asoa. O le afiafi nei o le ā tatou fa’asoa ai ma fa’amalamalama i tupulaga le tasi vaega tāua lea o le va nonofo ai o aiga Samoa. **‘O le matai ma sulii o le aiga’**

O LE MATAI O LE AIGA”

O le aiga potopoto latou te filifilia le matai matua po’o le sa’o e fai ma tausimea, auā le mamalu o le aiga. E ta’ita’i ma puipui e le sa’o lona aiga ma tausi ma le alofa i ona tagata, fanua, measina, ma lo latou tofi mo le manuia o le aiga atoa. E mafai foi ona tofia nisi matai o le aiga potopoto e fesoasoani i le tausiga o le aiga. E fono fa’atasi le aiga i po o le Aso Sa e talanoaina ai fuafuaga o le vaiaso o lumana’i. O le taeao o le Aso Gafua e auai matai o le aiga i le fono a le nu’u, e talanoaina ai fuafuaga a le nu’u mo le vaiaso o muamua, auā le manuia lautele o tagata uma o le nu’u. Ua manino lelei lava i’inei, o le matai o le tausimea i le mamalu o lona aiga, aemaise o latou nu’u.

O TIUTE MA MATAFAIOI A LE MATAI.

1. O le Sa’o, o le alii matua lava lea o le aiga e pule fa’amalumalu. O le tausimea, ma ta’ita’i lona aiga. E aua’i o ia i le a’ufono a le nu’u e masani ona fono i Aso Gafua e talanoaina ai fuafuaga auiluma mo le manuia o le nu’u.
2. **TULĀFALE PO’O LE FAILAUGA**
O le tulāfale po’o le failauga o le aiga, e atamai i le aganu’u ma tautala i mea e fai a le aiga ma le nu’u.
3. **FALETUA:**
O le to’alua o le sa’o po’o le alii o le aiga, e i ai ona tiute fa’apitoa e fitoitonu ma lona vala’auina.
4. **TAUSI:**
O le to’alua lea o le tulāfale o le aiga, e i ai foi ona tiute fa’apitoa mo le tausiga o le aiga ma le nu’u.
5. **TAMA’ITA’I:**
E ta’ua o sa’oao ma aualuma, po’o ‘augafa’apae, o lo latou tiute tau’ave o **le fai’oa**, po’o lo latou faiva alofilima e gafa ma le lalagaina o iesina, fala (i so’o se ituaiga), o le gaosiina o siapo, o mea taulima. O ‘oa po’o measina e aogā mo mea e fai a le aiga. E ta’ua foi tinā ma tama’ita’i o le pae ma le ‘auli, ona o lo latou tomai i le fa’aleleia ma le fa’amafolafolaina o ma’anumini e ono tula’i mai totonu o aiga, auā o lo latou tofi lea mai le Atua. E iai foi le upu e masani ai e fa’apea,

‘ E au le ina’ilau a tamaiti’i e molimauina ai o so’o se gaoiga e faia e tama’ita’i e atoatoa lona fa’ataunu’uina.’

6. MATUA TAUSI:

O tinā ma tamā ua matutua ma ua pulapula la goto lo latou soifua, ma ua lē o toe tutusa le malosi o le tino. Ua ave i ai le fa’amuamua a le aiga i le tausia lelei ma le alofa i totonu o o latou lava aiga, ma ua fai ma avea ma matua tausī. E talitonu foi le atunu’u, o le talavou e fa’amaoni ma fiafia e tausī matua, e maua fa’amanuiaga mai le Atua e ala mai i matua tausī.

7. TAULELE’A:

E ta’ua o le ‘aumaga, o le malosi lea o le aiga ma le nu’u, o lo latou tofi o le tautua i le matai ma le aiga fa’apea ma nu’u.

8. NOFOTANE:

O le avā o lo’o nofo i le aiga o lona to’alua (lana tane).

9. FAIAVĀ:

O le tane o lo’o nofo i le aiga o lona to’alua (lana avā). O lona tiute o le tautuaina lea o le matai ma le tausia o le aiga e ala i le atiina’e o fa’atoaga ma le fagotainaina o le sami mo le fofoga taumafa o le aiga. Ua i ai le suiga o lenei vaitau ina ua lelei galuega ma tofiga o faiaivā i totonu o le aiga.

10. O TAMAITI:

O fanau uma po’o tamaiti o le aiga e fesoasoani e fa’amamā le otaota o le fanua, tufi le popo, ma aumai ālala mo le afi auā le kukaina o taumafa a le aiga.

11. TAUSOGA:

O suli po’o tagata uma lava e tau pe aiga i le aiga potopoto.

O NAI FA’AMANATU TĀUA I TUPULAGA IA SILAFIA NAI MEA IA –

1. ITUAIGA O FALA A SAMOA. (igoa)

***** FALALILI’I : E lua ituaiga fala lili’i**

1. TU’ULAUFALA: E lalaga lava i le laufala. E fa’avulu uma ona pito e fa.

2. AFEAFE: E lalaga foi i le laufala. E na o le lua ona pito e fa’avulu, o pito e lua i le umi o le fala

3. PAPA LAUFALA: O le fala e lalaga foi i le laufala, ae le fa’avuluina i se vulu, e lē tutusa foi lona lautele ma le fala lili’i, e lau ititi ifo, vaganā ai le umi e mafai ona tutusa.

4. PAPA MALŌ: O le fala e lalagaina i le lau paogo (o le isi ituaiga fala). E malō ma patuavalu, e fa’aogaina tele i aso la e pito i luga o polavai i le fola o le faleo’o tanu ma’a a le aiga. E leai ni ona vulu, e lē lautele, ae lalaga lava i le umi e mana’omia e le lalaga fala.

SULI O AIGA –

1. SULI TUPOLATA - o le suli moni po’o le suli tau toto o le aiga. (Blood relative)

2. SULI SA’OTĀ – o le suli tamafai po’o le tama fa’ate’a. (One who is related to the family through adoption)

3. **SULI TUPOLO** –o le suli e ala i le faiavā po’o le nofotane mai i le aiga (One who is related to the family through marriage)
4. **SULI TUPEA** – o se uo po’o se tasi e masani ma ua leva ona nofo ai i le aiga. (One who has become a relative of the family through long time friendship and acquaintances)

FA’ATALANO MA FA’ASOA MANATU I FESILI IA:

1. Fa’amata o le ā se suiga tele ua i ai i aso nei, i le sailiga o suafa o aiga? O tumau pea le faiga sa i ai i aso ia o le tofia o se tagata matua e tausia aiga?
2. O le ā se manatu o tupulaga i aso nei i le upu a le atunu’u, “O le ala i le pule o le tautua.”
3. O ā ni suiga tetele ua iloa i nei aso e tupulaga, e tusa ma galuega sa fa’atino e tinā i aso ia”

UPU FA’AI’U:

Ua manatu foi o le ā fa’agata ai inā le tatou fa’asoa. Taliotnu ma fa’amoemoe ua fa’afiafiaina tupulaga e fa’alogologo ma taofi si fa’asoa o le nei afiafi. E i ai foi le talitonuga, atonu e fou i nisi tupulaga, ae ta’oto atu lava i ā outou Susuga le fa’amatalaina o nai vaega ia. Ua taumafai lava e lē o’o i le loloto, ae ia silafia e tupulaga nai amataga faigofie ia auā ua suia ia mea uma i le lalolagi ua tatou i ai nei, ae tāua pea lo latou iloa o lo latou fa’asinomaga ‘autū. Fa’amoemoe tatou te feiloa foi i le lumana’i e fa’aauuina ai la tatou mataupu e FA’AVAVAU AIGA.

MANUIA TELE LENEI AFIIFI.



**ASO SA – APERILA 26, 2026 “FA’ATALATALANOAGA FA’ALAU’ITELE”
MATAUPU – “AISEA UA TĀUA AI PEA I TAGATA SAMOA LE TATAU PO’O LE MALU?”**

FA’ATOMUAGA-

Ua manino le mataupu ua manatu e lelei foi le fa’asoa i ai o tupulaga, auā ua maitauina foi le aga’i pea i luma o le fa’atāua a nisi tupulaga i lo latou mana’omia o lea foi measina a le atunu’u. E ioe foi le taofi ua silafia ma nofofale i a’ai o finagalo ma talitonuga o le atunu’u i le tāua o le tatau ma le malu. E leai foi se manatu e tu’u maotua se fa’asoa i le amataga ma le tala lasi o le atunu’u i le pogai ma le amataga o le tatau ma le malu. Ta’oto iā i latou o o latou faiva ia. Peita’i, ua tupu pea se lagona tatou te fa’asoa ina ia tupu ma maua ai ni a’oa’oga tāua mo tupulaga, a’o filifili ai i le tau’aveina o ia measina, e lē gata i alii a’o tama’itai foi. O le fa’amoemoe la o le fa’atalatalanoaga, o le ā tatou asia ai nai vaega faigofie e lagalagā ai manatu ma filifili tonu ai le alii po’o le tama’ita’i, pe tatau mo ia pe leai foi le tatau po’o le malu.

SINA VA’AIGA LAUTELE I MAI O SUIGA LE FA’ANA’E

O le fa’ana’e mai o le toa’tele o i latou ua nauanu i le tatau po’o le malu, ua tatou mautinoa ai le lotonu’u ma fa’aauuina pea o le mitamitaga o o tatou tagata ma tupulaga foi, i lo tatou ta’u o Samoa auuluuli moni lava. E ui lava foi ina ‘ese’ese nofoaga ma atunu’u ua tutupu ma aumau ai nisi, ae ua iloga lava lo tatou fa’asinomaga. Pe tala foi gafa i isi atunu’u ma isi aganu’u o tatou tagata, e lē lilo lava le toto ma le to’ala fanau o le Samoa moni. Ai o le ala lea e moni ai le upu a le atunu’u, ‘**e lele lava le toloa ae ma’au lava i le vai.**’ A’o le fatu pese Eperu foi na lagona ifo I Ina loto, Pe aumau ma pese i nu’u ese, e sisi pea le fa’amalama ma va’ava’ai atu iā Ierusalem le nu’u pele ma lona fa’asinomaga. Afai foi e galo le Ierusalem, ia galo lava i le lima taumatau, ia pipi’i a’e le laulaufaiva i lo’u gutu, pe a lē fa’asili le nu’u moni. O sa’afiafia ia o le lotonu’u fa’amaoni, e afua ai ona lē galo measina ia, ma

naunau pea i ai le lotu. E mou atu tupulaga, ae aga'i mai pea tupulaga, e tumau lava le fa'asinomaga ma le tofi o Samoa mai le Atua.

O NISI O MEA TAUA I LE TATAU MA LE MALU I ASO UA MAVAE

E pei lava ona sōsō atu, o le ā le o' lava se tala i le amataga ma le gafa o le tatau ma le malu, ua iloga lava aiga ma i latou e 'apepeleina, ma fa'atinoina. Ae o le ā tatou fa'asoa fa'afaigofie pea e tusa ai ma le va'aiga i nei ona po ma le lae'iina o ia measina, aemaise lava o se fesoasoani mo tatou tupulaga ina ia iloa ma le mautinoa, afai o le measina a Samoa, o lona uiga foi la, e lē ave'esea le tāua ma le mamalu o ia mea. Ma e lē lae'iina foi ona o ni tifiga ma le fia show, ae o lona fa'asinomaga ma le iloa lelei tausi nafa ma fe'au fa'atino i aiga, nu'u ma Ekalesia.

Ua manino i taotu uma ma silafia, o le tatau o le fa'aailoga o le ulufale atu o le alii i le nu'u o taulele'a ma matai foi. O le fa'aailoga o le matua ma ua agava'a i le tofā ma le utaga, ma ua la'asia foi le tautua e tatau ai i le tausiga o nu'u o taulele'a fa'apea foi le nu'u o alii. O le taina o le tatau sa na o le itupa lava o taulele'a e mafai ona ta, a o le malu e mo le itupa o tamaita'i. O le talitonuga masani po le tapu o le galuega lea, e lē mafai ona ta nisi i se numera lē soagia, e tatau lava ona soagia le 'au tatā ona fa'atino lea o le galuega. O lo o fa'atino pea i aso nei nisi o faiga o le galuega, e pei o pesega ma le tapua'iga se'ia o' lava ina umusa ma sama le tatau po'o le malu.

Ia manatua e ui lava i le talafa'asolopito o le tatau ma le galuega mai le amataga e pei ona silafia uma, ae o le mea ua tatou iloa lelei na suia lava ina ua o' mai i samoa, ma tatā ai loa alii ae lē o fafine

TALITONUGA FA'ALE- LOTU I ASO UA MAVAE

O le talitonuga fa'avae o le Ekalesia i aso ua mavae, e lē mafai ona ta se pea a se tasi ua ma'ea ona fa'akalesiaina i totonu o 'aulotu. O le mau na fa'avae ai e fa'apea, "o le agasala o le fa'amaligi toto" O le talitonuga lea o le Ekalesia, o le maligi o le toto i le tagā tatau e lē tusa lea ma le molimau a le Ekalesia. Sa matuā iloga lea tapu iā i latou sa taumafai e ave ma faifeau o le Talalelei. Sa matuā iloga lava ona lē mafai ona a'otauina se tasi e tau'aveina le tatau i totonu o aoga fa'afaifeau a le Ekalesia. O sā ia sa fai ma fa'ava'atu'ia i lotu o i latou sa fia ofoina lo latou soifua mo le galuerhga tala'i a le Alii. E o' lava foi i se tasi e ta sana tatau ae ua i ai i totonu o le Ekalesia a Keriso I totonu o 'aulotu, e a'afia lava I le tu'u'eseina mai le aiga o le Atua, po'o le pa'u o le tofi Ekalesia.

UA TATALA I ASO NEI IA TAPU

Ua i ai le suiaga i le gasologa o le lotu i lenei foi vaiata, ua fa'atagaina le 'aufaigaluega i le galuega fa'afaifeau ua ma'ea ona taina tatau. Ou te manatu ua fa'apeaina foi ma malu o tamaita'i. O u te ioe foi i lea fa'atofalaiga. Vagana ai le tatāina o tatau ma malu a ua uma ona fa'akalesiaina, pe o a'afia uma ai i le fa'atagaina lea. (O le ā fesoasoani ane le 'aufaigaluega Faifeau i lea vaega fa'amolemole e fa'amalamalama I tupulaga).

UPU FA'AI'U:

O le mau tau'ave a le atunu'u i se tagata e mana'o i le lae'i a le atunu'u e fa'apea, "E lelei ona ta muamua le gutu ona ta ai lea o le pea (tatau/malu). E talitonu lava le taofi sa fetau lelei ma ia aso lea upu i augātupulaga mai le amataga. Auā o le lae'i lea sa mata'ina ai le tagata na te tausia aiga aemaise o nu'u i lona fofoga lafolafola. Auā o le fofoga fetalai lenā sa iloa ai le alii i saofa'iga a matai. E lē gata e potu e fetalai, a'o le paleni o le fofoga ma le tatau iā te ia. O le taofiga foi i ia aso, e lē so'ona si'i se pulaū auā o le faiva o le fetalai, o le matai po'o le taulele'a e ta le tatau. Ua alu aso ua fa'asolo mai foi

aso, ua tatou iloa ai le suiga e pei ona i ai nei. Ua malamalama i tatou i le lotu ma lona fa'amoemoe, ma le mataupu silisili. Peita'i, e lē ave'esea ai lo tatou taumafai e fa'a-kerisiano a tatou tu ma aganu'u ina ia o fa'atasi ma le talalelei, le ala lea o le i ai o suiga, mai lea taimi i lea taimi, mai le isi tupulaga i le isi tupulaga.

O le fa'atāua o lenei fetufa'aiga, o se fesoasoani i tupulaga ina ia lē mana'o i le tatau ma le malu ona o le moge oso o lagona fa'atama ma teine o aso nei i le felanulanua'i o le lalolagi ma ona faiga. Ia lē naunau i le tatau po'o le malu ona o ni tifiga ma ni show e fia fa'aailoa atu i le lalolagi o taga eseese. Ia lē mana'o ona o se manatu ia tulaga ese mai ai i isi tupulaga e filifili pea latou i le pulaū. Ia mamao ese ma le lagona e lae'i ia lae'i ona o vi'iga mai tagata. Ae ia totō i loto o tupulaga le tāua o lona ta'u o le tama ma le teine Samoa moni, e ala i le fa'aaogāina lelei ma le tatau o mea sins a le atunuu e faamemelo pae I ai. Manatua, e lā o ni pe'a ma ni malu e fa'aaliali na o siva pe ā tumu tagata, ae fiu e va'ai i feau e fa'atino ua tau su'e.

FESILI: O le ā le uiga o le manatu ia fa'aaogāina lelei ma le tatau le lae'i a le atunu'u?

O se manatu faigofie o le tusitala, O le fa'aaogāina lelei ma le tatau o le lae'i a le atunu'u, o le fa'atinoina lea o tiute ma nafa o sē o le ā ia filifili e lae'i i le tatau po'o le malu. O ia nafa ma tiute o le tauleale'a Samoa po'o le tama'ita'i, e lē tau tuli se'iloga o le tatau po'o le malu, ia po'o lē leai foi, a'o le tāua o le lae'i, ua o gatasi lea ma le mitamitaga o le Samoa, e atoatoa ai le fa'agae'etia Ile fa'atinoga o ona tiute. Ia silafia e lē o tagata uma e lae'i I lae'i ia e iloa fa'atino o latou tiute I le lelei e tatau ai, e i ai foi tagata e lē lae'i i le tatau po'o le malu, e sili atu ona maoa'e lana fa'atinoga i lo i latou ia. O le ala lea o le manatu, O le fa'atāua lava, ia lē avea le tatau po'o le malu o se mea noa e leai se mamalu iā i tatou o Samoa, a ia mautinoa ona fa'aaogāina ma fa'atino tiute fa'asamoa i so'o se mea, ae lē o le fa'ataloga i vai ma fa'atasina ai le tāua o le tatau po'o le malu. Lae'i ma le fa'aeteete, fa'aaoga tatau mo le vi'iga o le Atua, ae lē o le avea ma fa'aaliga e faia pea e leai se uiga tāua. Ua sui aso ma ona faiga, ae ia tautuanā e tumau pe le 'anofale o le tatau po'o le malu Samoa, i lona tāua ma le mamalu i la tatou aganu'u, ae sili ai, e fai ma tautuaga e vi'ia ai le Atua, e lē gata i aiga, nu'u, atunu'u, aemaise lava le galuega a le Atua ma lana Talalelei. O le toe upu, E lē leaga pe fa'asā le ta o le tatau po'o le malu, ae fa'atoā upuia lava pe ā fa'aaoga sesē ma le lē tatau pe fa'ataloga i le manatu. Manatua o Samona ua uma ona tofi, o le atunu'u foi e mamala ona tala ma ona fa'asinomaga.

MANUIA LE FAASOA I LENEI AFIIFI.

ASO SA – ME 03, 2026 “SU'ESU'EGA I LE TUSI PAIA”

MATAUPU – “FA'AMAMALU LE LAU'ELE'ELE O SE MEAALOFA MAI LE ATUA”

TUSI FAITAU – IOSUA – 6: 15 - 25

FA'ATOMUAGA –

O fa'amoemoe o lenei su'esu'ega e fia tulimataina, o le toe fa'amanatu i tupulaga le tāua o le fa'amamaluina o tatou lau'ele'ele ma fanua o meaalofoa mai le Atua. O le lau'ele'ele, na te aumaia le fa'alogona o le aiga, fa'asinomaga ma le auai, ma o se punaoa e fa'atamāoaigaina ai tagata. O le lau'ele'ele na folafolaina iā Aperā'amo, o lo'o avea ma totonugālemu o feumia'iga a le Atua ma Isaraelu, o le molimau mautū i le Atua fa'apea le nu'u o Isaraelu. I totonu o lea lau'ele'ele, ia ola ai Isaraelu ma le ususita'i i le Alii lo latou Atua. Ua tu'uina atu e le Alii lenā a'ai mo i latou. Peita'i, o folafolaga o lo'o i le lau'ele'ele fa'atoā tino mai ina ua ola Isaraelu i se olaga usita'i fa'amaoni i le

feagaiga ma le Atua, i le amiotonu ma le fai mea sa'o. O le ā sau feso'otaiga i le lau'ele'ele o lo'o e soifua ai? E fa'apefea ona e tausi i ai?

SINA AOTELEGA PU'UPU'U O LE TUSI FAITAU:

O le tusi o Iosua, o se tusi fa'atupu vevesi, aemaise lava mo tagata kolone. Peiseaī o se tusi e fa'ataga ai osofa'iga, nofoia ma fa'aleaga 'ele'ele o isi tagata. O le fa'amoemoe ea o le tusi o Iosua e fai ma laisene e fa'ataga ai osofa'iga, po'o se tusi e tete'e ai i nei ituaiga faiga o le fao fa'amalosi fa'atusatusa i le Faa masino I? O se faataitaiga e iloa ai pe fa'apefea ona faasala e le Atua i latou e tete'e (le 'au Sā Kanana), ma se lapata'iga iā Isaraelu pe a latou faia foi fa'apea? **E fa'apefea ona tatou faitauina tala o le fa'ate'a'eseina ma le tuli'esea? E fa'apefea ona tatou nonofo fa'atasi ma tagata-nu'u po o i latou na ulua'i 'ainā ma nofoia lau'ele'ele?** Ou te talitonu, o totonu o fetaua'iga ma le tulaga fa'a-kolone o le tusi, o lo'o ta'atia ai le 'ano ola ma mafatotoga e fai ma ta'ita'i ala mo le soifua i totonu o le nu'u o le folafolaga.

SINA FAASOA MO LE MATAUPU:

O lau'ele'ele po'o fanua, o meaalofa ia a o tatou aiga mai le Atua. O o tatou tofi ia ma meatotino ua atia'e ai o tatou aiga, auā o le lau'ele'ele, o se vaega tāua ua tua i ai le tagata ola. Afai o lo tatou fa'asinomaga lea mai le Atua, e ao foi la iā i tatou ona tatou tausia ma leoleo lelei, ma atia'e i mea lelei e tusa ma le finagalo o le Atua. O lona uiga, e mamalu o tatou fanua ma nu'u, pe afai e lē o fa'atutūina ai ni mea inosia, ma leai ni uiga matagā o tutupu mai ai. E mamalu foi lau'ele'ele ma fanua pe afai o ola tagata uma i le amiotonu a le Atua. Sa fa'aumatia e le Atua o fanua ma a'ai o Sotoma ma Komoro, auā sa leai se mamalu o le Atua na i ai, ona e agasala ma ifo i tupua na latou faia. (Kenese – 19).

O le nuu ma le lau'ele'ele na folafolaina atu e le Atua iā Apera'amo i le amataga (Kenese 12: 1, 19e) O le lagolago malosi lava lea i le fesoota'iga a le Atua ma lona nu'u filifilia o Isaraelu. O lenei lauelele e ao ai iā Isaraelu ona ola ai ma usiusita'i i faasinoga ma le finagalo o le Atua. O le mamalu foi o lo latou tofi o lo'o iā i latou lava, pe a tumau i le faatuatua i le Alii. Na sopoia atu le Ioritana e Isaraelu, ona latou tolauapi lea i Kilikala, e sauniuni mo le osofa'iga o le uluai a'ai o Kanana e igoa iā Ieriko. Peitai, sa faa iloa e le Alii iā Iosua, ua na foa'iina atu le nu'u iā i latou. O lona uiga, a'o le'i fa'ataunu'uina le osofaiga a Iosua ma Isaraelu ua mautinoa le fa'ato'ilaloina o le fili i le malosi o lo latou Atua alofa.

O i tatou foi o Kerisiano, o lo'o tatou tau pea ma lo tatou fili o satani. Peita'i, o le fili lenā ua ma'ea ona fa'ato'ilaloina e le Alii i lona alofa tunoa, ma ua tatou manumalō i ai. (Roma – 8: 37 – 39). E lē tataua ona fa'avaivaia i tatou e le fili ua fa'ato'ilaloina, pe afai tatou te fa'atuatua i le malosi o Iesu. O le mea foi lea e finagalo ai le Alii iā Iosua ma le nu'u, ia usiusita'i ma fa'ataunu'u la'asaga uma ua fa'atonuina ai i latou, auā e mai le Atua lo latou manumalō.

O fa'asinoga mai le Atua mo Iosua ma Isaraelu, e le faigofie i lo latou sauni atu i le taua. E tataua i 'au uma o le taua ona tasi le fa'ata'amilosaga i le aso e tasi, ma faia i aso e ono. E ave e faitaulaga e to'afitu pu e fitu ma ilia i luma o le 'atola'au o le feagaiga, ae mulimuli atu ai muli'au i le 'atola'au a le Alii. Peita'i, o le aso fitu, e ao ina fa'ata'amilo fa'afitu ai i le a'ai. E ilia foi pu e faitaulaga ona fai atu ai lea o Iosua i le nu'u, inā alalaga, auā ua foa'iina mai e le Atua le a'ai mo i latou.

O lenei fuafuaga tataua ua fa'atonuina ai Isaraelu e le Atua, ua na o se sa'iliga o lo latou fa'atuatua, ae po'o moni le mulimuli i lo latou Atua. O le ilia foi o pu, o le fa'aailoga o le manumalō mai o latou fili, ona o lo latou Atua. O le fa'amamaluina e Isaraelu o lo latou tofi mai le Atua, e ao ina amata atu i le usiusita'i e faia fa'asinoga ua 'aumai e fa'ato'ilaloina ai le fili, ae fai mo i latou le Kanana ua

vavae’eseina mai e le Atua mo i latou. Aua foi ne’i manatu Isaraelu iā latou au’upega ma le popoto e fai taua. Ia manatua lelei ua fa’atoina e le Atua le a’ai ma mea uma ua i ai, ina ia pa’ia ma mamalu le lau’ele’ele mo i latou.

UPU FA’AI’U:

O le aso o le fa’ato’ilaloina o le a’ai o Ieriko, sa faia lava e Iosua ma le nu’u, e tusa ma le poloa’iga a le Atua. Na ili pu e faitaulaga, ona alalaga lea o le nu’u ma le leo tele. O le taimi lava lea na solo ai i lalo le pa o le a’ai, ma āea ai loa e le nu’u ma fa’aumatia tagata uma ma manu uma sa i le a’ai. Ua fa’aalia le fa’amasinoga tonu a le Atua fa’asaga i mea inosia ma le agasala o faia e tagata Kanana. O le fa’amasinoga a le Atua, e tatau ona matuā fa’aumatia le ifo i tupua ma mea leaga uma, auā o le tete’e lava lea i le Alii. (Teuteronome – 12: 2, 13: 12 – 18). E finagalo le Atua ia ave’ese nei mea leaga uma, ina ia mamalu ma fai ma lau’ele’ele mamā le nu’u o le folafolaga. E lē gata i lea, ae mafai foi ona a’afia ai le olaga o Isaraelu pe afai e nonofo pea ma nei mea inosia. E le’i fa’aumatia e Isaraelu le fafine o Ra’ava ma lona aiga uma, auā na fa’atuatua i le Atua ma fesoasoani fa’amaoni iā Isaraelu i lo latou taunu’u i le nu’u o le folafolaga. Na fa’asaoina foi e Iosua o ario, auro, ipu apa memea ma u’amea e lē ina ia mauoloa ai tagata, ae ia faamatagofie ai le fale o le Alii ma ona sauniga. O le foaiina mai e le Atua o Kanana po o le nuu folafolaina mo Isaraelu, o lona finagalo lava ia tumau tagata i le faatuatua, ina ua tausi le feagaiga, ia ola i le amiotonu ma tausisi i tulafono uma. O le tino lenā o lo latou faamamaluina o le lau’elele na tauto ai le Alii mo i latou. O lo latou fesoota’iga lea e tasi le nu’u ua ola ai. E a’oa’o mai foi lenei mataupu mo i tatou le tupulaga. E mana’omia e le Alii ia tatou ola faapaiaina ma faamama a tatou amioga pe afai ua amata lou ola fou iā te ia. E lē tatau ona aumaia o tatou manaoga ma tuinanauga o lenei olaga, e filogia ai le ola faaleagaga ua tatou ola ai. E mamalu o tatou aiga ma fanua po’o lauele’ele, pe afai e alala ai tagata ma tupulaga ua fa’amamalu e le Atua e ou mealofa ia, ma lona finagalo pa’ia ia tausi ma leoleo i ai. Fa’amamalu le Aso Sa tupulaga, fa’amamalu ma to’a’aga e fa’amaoni I faigalotu I afiafi i aiga. O le aiga e fa’asala ‘ese mai le ola fa’amamaluina o le finagalo alofa o le Atua, e malepelepe, fea’ina’i, ma ta’ape’ape. Ia mamalu o tatou fanua ma lau’ele’le ae silisili ai ona fa’apa’ia o tatou olaga o lo’o ola i luga o mea alofa foa’ifua ia mai le Atua, o tatou tofi, o le fanua ma lau’ele’ele.

FESILI FA’ATUPU MANATU MAI LE MATAUPU

1. O le ā sau feso’ota’iga i le lau’ele’ele o lo’o e soifua ai?
2. E fa’apefea ona e tausi i ai?
3. E feso’ota’i le fa’amamalu ma tausi le fanua ma le lauelele ma lou soifua faatupulaga o aso nei?
4. O le ā se fe’au mo oe le tama ma le teine talavou e fesoasoani ai i nisi tupulaga ua lē iloa ona fa’apa’ia ma fa’amamalu le lau’ele’le ma le fanua o nofo ai?

MANUIA TELE LE AFIAFI, MALO LE ONOSA’I



**ASO SA – ME 10, 2026 – “ASO SA O TINA”
 MATAUPU – “O LE TINĀ FA’ATUATUA O KANANA”
 TUSI FAITAU – MAREKO – 7: 24 - 30**

FA’ATOMUAGA -

O le Aso Sa lenei o tinā e pei ona fa’amanatuina pea I tausaga uma. O le mea lea e fia fa’ao’o atu ai alofa’aga ma fa’amanuiga mai lo tatou Ofisa nei, i tinā uma o ‘aulotu ta’itasi, E amata mai i Faletua o Toea’iina, Faletua o Fa’afeagaiga, aemaise o Faletua o Faifeau ma A’oa’o, ma tinā uma o ‘aulotu uma.

Malō le galulue, fa'afetai le onosa'i, ia manuia tele lo outou Aso Sa fa'ailogaina, ma ia maua lo outou malosi I le tino, mafaufau ma le agaga, auā galuega o lo'o galulue ai, aemaise o le Ekalesia a Keriso. Manuia tele le Aso Sa o tinā.

O le fa'amoemoe o le fa'asoa i lenei afiafi, o le toe polili lava lea i tupulaga ina ia mausalī ma tafatasi le fa'atuatua i le Atua e tupu ai le onosa'i ma le loto maualalo, aemaise lava o au'upega ia e mafai ai mea faigatā uma o le olaga. O le fa'atuatua na iloa i tinā, e maoa'e lava lea e fa'atatau i ai lo latou mātu'upalapala mai le atunu'u e fa'apea, "e au le ina'ilau a tinā" o tinā e fai mea mafai, e lē solomuli i mea faigatā se'iloga e taunu'u. E manatua pea le upu a si toea'ina o Masalosalo i lana Pulega a le Fagaloa, o tinā ua tumu i le fa'asoēsā i mea lelei. E fa'asoēsā ma finau, ae mao'ae ma vi'ia le Atua i mea latou te fai. O le fa'asoēsā aogā. Manuia tele outou tinā.

O SINA TALA I LE AMATAGA O LE ASO SA O TINA:

E i ai le taofiga o le ā le tasi so tatou talitonuga i se tala e mafua ai le Aso Sa lenei o tinā. E tele talatu'u o lo'o ta'ua ai sauniga e talafegai ma le Aso Sa ua tatou fa'ailogaina o le Aso Sa o tinā. Peita'i, o si sa'ili'iliga lea ua maua, o se tasi o talatu'u mo lenei aso fa'apitoa, na afua mai i le malo o Roma. E fa'apea le tala, e i ai lava aso fa'apitoa e fa'amanatu ai 'aiga tetele i lea malo e ta'ua o **HILARIA**. O le uiga o lea aso fa'apitoa, e fa'a'auto lea i le atua tama'ita'i o Saipele (Cybele) Peita'i, na mafuli le to'atele e fa'amautūina le taofi o le tatou aso o tinā, e lē mafua mai i'inā.

O le mafuaaga ma le amataga o le aso ua ta'ua nei o le Aso Sa o tinā, na amata lava e si tama'ita'i Amerika o Ana M. Iavisi (Anna M. Jarvis). O le tala e fa'apea, sa fa'atumauiina pea le fiafia o lenei tama'ita'i i le nofo to'atasi, ma sa fa'aalia foi lona latalata i lona tinā. Sa fa'au'uina le tama'ita'i o Ana i le Kolisi i West Virginia ma galue fa'afaia'oga ai i'inā, mulimuli ane na tu'ua ai loa e ia Virginia mo Philadelphia.

Ina ua maliu si ona tinā i le aso 5 o Me, 1905 i Philadelphia, sa amata loa ona tupu a'e se lagona i lenei tama'ita'i e fa'amanatu se aso fa'apitoa mo tinā uma i Philedelphia. Ua mavae le lua tausaga ona amata lea ona fa'atino le mana'o o Ana ina ua talatalanoa i ana uo. E fa'apea le tala na molimauina lenei tama'ita'i o Ana i lona manatu alofa tele i nai tinā o Philedelphia ua agaleagaina ma tu'ulafoa'ina e ā latou fanau matutua. Ona tupu ai lava lea o le lagona o le tigā alofa o Ana ma amata ai loa tusi tauanau e fa'afeso'ota'i ai faifeau, o ulu o pisinisi atoa ma ta'ita'i o le Setete ma le faamoemoe e maua se lagolagoina o lona manatu.

Iā Me 10, 1908, na faia ai loa le ulua'i sauniga i le falesā i Grafton, West Virginia. Sa fai foi le isi sauniga na fa'ata'atia ai e Ana le fa'avae o le fa'aaogāina o ni fugāla'au ona o lona tinā o se tinā e fiafia tele i fugāla'au. O le fugāla'au pa'epa'e mo tinā uma ua tu'ua le mafutaga, a'o le fugāla'au mūmū mo i latou o lo o soifua pea.

Mulimuli ane, ua silisili atu le uiga ua o'o i ai lagona o le fa'amanatuina pea o lenei Aso Sa e pei ona mafaufauina e Ana i le amataga. O se tasi la o nei lagona o le mafutaga so'oso'o tau'au a le tinā i lana tama, o le alofa lea, ma ua olaola pea lenei lagona i so'o se nofoaga ma sitete ua sosolo atu i ai le fa'amanatuina o lenei o lenei Aso Sa. I le tausaga e 1910, na aloa'i ai loa le folafolaina o le fa'atuiina ai o se fa'alapotopotoga e aia'ia le uiga ma le fa'amanatuina o lenei aso. A o le tausaga e 1913, na pasia ai se pili i le maota o Sui i Amerika, ina ia talosagaina le Peresetene e fa'alauiloa lenei aso fa'amamaluina i Aso Sa lona lua uma o le Masina o Me.

Na maliu Ana i le 1944, ae ua tupu pea le fa'atāuaina o le Aso Sa o tinā e pei ona ia mafaufauina ma amataina. I aso nei, ua tatou fa'amanatuina lenei Aso Sa e feofo'ofota'i ai mea alofa a fanau i latou tinā e fa'apea iā tamā. Tatou te lagonaina le loto fiafia, 'oli'oli, fa'afetai i le Atua ona o le tama'ita'i o Ana, e ui ina e le'i ave ma tinā, a ua ia fa'ata'atia se ala matagofie tatou te mafaufau ai i le tāua o tinā ma la latou galuega i totonu o aiga, nu'u, o galuega, aemaise le Ekalesia.

O LE TUSI FAITAU

O le tala mai le Tusi Paia i le fafine Kanana, e fa'apea le taofi o le fa'aolataga e muamua lava Iutaia ona soso'o ai lea ma tagata o nu'u ese. O lenei le manatu na fa'aalia atoa ina ua uma le maliu ma le toe soifua manumalo o Iesu Keriso. O le soifuaga tala'i, galue ma le fa'aola, ua fa'amalōlō ai nisi o nu'u 'ese pei o lenei tala. E foliga mai e ui lava ina fa'amua Isaraelu ae o lo'o tatala lava e Keriso le avanoa mo tagata o nu'u 'ese ona o le malosi o lo latou fa'atuatua i le galuega fa'aola a le Keriso e pei ona fa'aali i lenei fafine. Auā o le mea moni e tusa ai o le tala a le tusitala o Mataio, e lē o ni tala talia gofie saunoaga a le Alii. Ae ona o le malosi o le fa'atuatua o le tinā, na ia taliaina ai le moni o lenei saunoaga, e ui ina talia gata i lagona fa'ale- tagata, aemaise lava iā i tatou (Samoa), e lē fia ola to'ilalo. Ae le'i afāina lea i le loto o le tinā fa'atuatua ma talitonu moni i le Alii ma le lē masalosalo.

SINA FA'ALAUATELEGA O LE TUSI MATAUPU

Ina ua o'o mai le galuega a Iesu i Turo ma Saitonu, ae fa'afetai e le fafine Kanana. Fai mai lenei tinā, Le Alii e, fa'amolemole se'i e alofa mai iā te 'au, ua ou mafatia tele, e lē maua se malōlō i aso uma ona o le ma'i o si a'u tama teine, a tali oti. O a'u feau masani ua lē mafai ona fa'atino, auā o lo'u mafaufau ua tu'u atoa i le tausiga o si a'u tama teine. Fai mai le tali a Iesu. **“Tama'ita'i e, e le'i 'auina mai a'u i nisi, ae tau lava o mamoe o le aiga o Isaraelu ua leiloa.”** Peita'i, e lē i taofia ai i'inā le aio'i fa'atauanau a le tinā lea. Le Alii e, ia e fesoasoani mai iā te a'u. Ona toe fa'apea atu lea o Iesu, **“E lē tataua na 'ave le mea'ai a le fanau ma lafo i uli.”** Se'i fa'alogofa foi i le mamafa o fetalaiga a Iesu na lu'i ai le fa'atuatua o lenei fafine o nu'u ese. Tupulaga, tou te silafia le tali a le fafine i le fetalaiga mamafa ma le tigā a Iesu, **“Le Alii e, e moni a oe, ae ui i lea o uli i lalo o le laoa'i, e a'ai i latou i momoi mea a tama.”** A fa'afaigofie le augani a le tinā, 'sa'o lelei oe Iesu, 'ave muamua mea'ai ma tagata ma fanau na e afio mai ai (Isaraelu), a'o toe'aiga e to'ulu ifo i le laulau ua lava lenā mo a'u. O se tali na matuā fa'ate'ia ma segia ai le māuli o Iesu. O le tali a le tinā fa'atuatua, e lē popole i le tigā pe faigatā, a'o le mea taulia iā te ia o le tu'uina atu o lona loto ua taumasuasua i le fa'atuatua, ma lona mautinoa lelei, ua na o Iesu lava e maua ai le tali o ona mafatiaga, ona o si ana tama ua tali oti.

O le fetalaiga a Iesu, “Funa e, ua tele lou fa'atuatua, inā alu ia, ona o lau upu lenā ua te'a le temoni sa i totonu o lau tama teine. E tatala pea avanoa mo tagata uma pea mausalī le fa'atuatua ua maua'a i le Keriso Faa'ola. Na ofo Iesu i le fa'atuatua o lenei tinā, ona tupu ai lea o le fa'amalōlōina ma le fa'aolaina o le tama teine a si tinā. Ua talepe e le alofa moni ona o le fa'atuatua, pa velloto I le va o tagata. **O tinā o le ola** i totonu o le aiga, nu'u, 'aulotu, ma le Ekalesia atoa, e o'o lava i le atunu'u ma so'o se nofoaga e mana'omia ai le ola.

NAI FESILI FA'ATUPU MANATU E MAFAUFAU PEA I AI

1. Na matuā ofo lava Iesu i le fa'atuatua o le tinā, Ae ā oe le tama ma le teine talavou, o ā ni mea o e manatu ua ofo ai Iesu iā te oe? Talosia ia o ni mea lelei, ae manatunatu pea i ai, ma fa'asa'o nei loa pe afai o fa'aletonu.

2. O le finauga a le tinā na lē mamafa ai iā te ia le tigā o upu a le Alii, E te manatu aiseā? Ae o le ā sou manatu pe ana fa’apea o se tinā Samoa na fetauī ma le saunoaga a Iesu?
3. Afai o le alofa moni o le tinā e lē fa’afiti ai i tigā, a ua fa’afia la ona e fa’atigā i lou tinā?
4. O le ā la sau meaalofa sili mo lou tinā i aso uma pe afai ua e talia e lē liliu le alofa o lou tinā iā te oe, e ui ina tigā ma puapuagātia lenei olaga?
5. E manai lava iā te a’u le pese a le faifeau o Lale Peteru e fa’ai’u ai le mataupu o lenei Aso Sa o Tinā. “TināTinā ea....po’o e lagona mai ita.....

MANUIATELE LE ASO SA O TINĀ – 2025

////////////////////////////////////

ASO SA – ME 17, 2026 “SUESUEGA I LE TUSI PAIA”
MATAUPU – “O ALA MANUMALO MO LE EKALESIA”
TUSI FAITAU – FA’AALIGA – 13: 1 - 18

FA’ATOMUAGA: Manatu sa maua se fiafiaga i le Aso Sa o Tinā i le na vaiaso ua te’a atu. Fa’afetai i tapenaga uma auā le fa’atāuaina o nai o tatou tinā uma. Malō le galulue.

O le fa’amoemoe o lenei fa’asoa i lenei afiafi, o le toe fa’amanatu pea ma saga fa’amanatu iā tatou tupulaga lo tatou so’otaga ma le Atua ina ia lē tausuai gofie i tatou aemaise lava tupulaga i le tele o talitonuga ma fa’auigaga ‘ese’ese o afioga a le Atua. Ua foliga mai ai ua aga’i atu ina taufa’afefe ma taufa’asesē i le tele o tupulaga ma aga’i ‘ese atu ai mai le fa’avae mautū o lo tatou talitonuga i le Atua manumalō a’ia’i e to’atasi. O le fa’asoa i lenei afiafi, o le lapataiga faigofie lava ina ia a’oa’oina pea tupulaga ia malamalama lelei, ia aua ne’i ta’ita’iina gofie i latou i ala taufa’asesē a le tiapolo, ma le felanulanua’i e foliga e taufa’afefe iā i tatou, a ia tutumau i le lototele ma fa’atuatua ma le lē fa’aga’etia gofie i le Alii manumalō i mea uma e o’o lava i le oti.

SINA MANATU FAIGOFIE MO LE MATAUPU;

O le mataupu o lenei afiafi, o lo’o fa’ailoa mai ai se va’aiga i manu po’o meaola e lua, e pei ona molimau mai ai le Aposetolo o Ioane.

1. Manu po’o le meaola muamua –

O le manu po’o le meaola muamua, e tupu mai le sami, o lo’o fa’amatalaina mai e fitu ona ulu, ma ona nifo e sefulu. O lo’o fa’ailoa mai ia va’aiga lona mata’utia tele ma lona malosi, fa’atasi ai ma le mana’o – tele i le tamāoaiga, ma lana pule i le tele o mea e pei ona naunau i ai tagata i lenei olaga. Peita’i, e leai, e leai lava se fa’amoemoe o taula’i lea va’aiga i se soifuaga fa’a – Keriso, ma e iā te ia foi le malosi fa’apolokiki.

2. Manu po’o le meaola lona lua –

O le manu po’o le meaola lona lua, e sau o ia mai le fogā’ele’ele, na te faia tala’iga sesē e fa’asesē ai tagata fa’atuatua i le Atua. E na te faia foi vavega mata’utia. O se isi foi ona va’aiga mata’utia, e tusia i le lima taumatau le fa’ailoga o lea manu, po’o lona muāulu foi le igoa o lea meaola o le 666. E i ai se manatu o lea lava ua salalau i le lalolagi, ma ua fa’aaogāina e nisi ia fuainumera i luga o upega tafa’ilagi i le soifuaga i aso nei.

FA’AMANATU MO TUPULAGA –

Ua fa’amanatu mai mo i tatou aemaise tupulaga i nei aso le talitonuga i le tusi o Fa’aaliga, o le lagi fou ma le lalolagi fou. O le ala lea o le matuā tataua ai iā i tatou ona matuā fa’amamafa lo tatou tutumau iā Keriso. E tāua ai foi le toe to manatu o tupulaga i lana tagāivai tau’ave, **ia ola tautua fa’amaoni mo**

Keriso. Ia lē fa’agae’etia gofie lo tatou talitonuga atoatoa i le Talalelei iā Iesu Keriso toetu manumalō mai le oti e to’atasi lava ia. O ana a’oa’oga ma fa’ata’ita’iga, e fa’afouina ai pea i tatou i le mafutaga fa’atasi ma lo tatou Alii. E tāua ai lo Itatou tutū fa’atasi e tete’e atu ia faiga taufa’amata’u ma le taufa’asesē a nei manu po’o nei meaola mata’utia, ina ne’i ta’ita’iina sesē ma fa’avaivaia ai i tatou o fanau a le Atua. O le mea e ao ona tatou manatua pea, po’o a sauaga ma fa’atosina a nei meaola e tau fa’amata’u ai i tatou ina ia fai i tatou ma ana ‘au. Ia aua lava nei o tatou talia ia fa’ailoga po’o fuainumera. Ia aua nei o tatou vaivai ai, pe tatou te fefefe ai. Ia tatou tutumau pea ma le mautinoa o Iesu na manumalō Ii fa’aosoosoga uma a Satani. Ia tatou tutumau pea i la tatou molimau i lea manumalō, tatou te mafai ai ona manumalō fa’atasi ma ia. Ua ma’ea foi ona fa’amaufa’ailogaina i tatou ma fa’atauina i tatou i le toto o Iesu le Ao o le Ekalesia, o lo tatou avanoa foi lea i le ola e fa’avavau, e leai lava se isi ala. Ia fai lava foi lea ma ala manumalō mo le Ekalesia atoa, ma aveva ai i tatou ma sulii i le lagi fou ma le lalolagi fou. O le ala lea o le manumalō mo tatou ma le Ekalesia.

FETUFA’AIGA I MANATU FA’AALIA:

1. Tu’u le avanoa i tupulaga e toe fa’amatala mai ai i ni o latou lava manatu e fa’atautau i se feso’ota’iga o le tusi faitau ma le mataupu. “O ALA MANUMALO MO LE EKALEZIA.”
2. E tatalo atu foi fa’amolemole i lau Susuga a le ta’it’ai e fa’aopoopo ma toe fa’alautele si a tatou mataupu mo nai tupulaga.

PESE: Uso e, talavou o le feagaiga fou, va’ai le vasa ua sousou.....

MANUIA LE FA’ASOA I LENEI AFIAFI, MALO LE ONOSA’I

ASO SA – ME 24, 2026 – ‘ASO SA PENETEKOSO’

MATAUPU – “FA’ATALITALI”

TUSI FAITAU – GALUEGA 2: 1 – 13

UPU TOMUA:

E lē fou le fa’amanatuina o le Aso Sa o le Penetekoso. Peita’i, e maualuga pea le lagona e fou pea aoaga ma feau fa’aali mai o le Agaga, aemaise o le silafia pea e tupulaga ma tatou uma le mamana o le galuega a le Agaga Paia mo tagata uma. O le tala masani, peitai, e fia fa’aauauina pea nai mafauauga e saga fagufagu ma fa’amanatu i tatou tupulaga, le uiga ma le tāua o le sa’ili i le Agaga i taimi uma o le soifuaga. O le ā tuliloaina e lenei fa’asoa le fa’amanatu i tupulaga, ina ia malamalama atili i latou i le tāua o le fa’atalitali i le fa’asinoala tutasi ma fa’amanuiaga e mai le Agasga Paia, e ta’ita’iina ai le soifuaga ma le ola o tupulaga ma tagata uma.

SINA FESOASOANI MO LE MATAUPU:

O le mataupu e pei ona fa’aailoa atu e lē fou, ae o le feau ua fia fa’amamafa mo tupulaga i lenei afiafi, o le **FA’ATALITALI**. O le fesili, o le ā se feso’ota’iga o le mataupu ma le Aso Sa o le afio ifo o le Agaga Paia? O le upu moni, ua tatou iloa ma malamalama i le uiga o le upu fa’atalitali. O le upu fa’atalitali, e fausia mai i le upu **fa’atali**. Ua fa’aopoopo i ai le isi “**tali**”, ona maua lea o le **fa’atalitali**. Ae afai tatou te va’ava’ai loloto i tua atu o le fa’atalitali, o lo o manino mai ai le loloto o le feau o lo’o aumai e le fa’atalitali, auā ua fa’asino tonu lea i le fa’atalitali mo se taimi umi, e pei o le fa’atalitali atu i le afio ifo o le Agaga Paia o le Atua. Peita’i, o lo’o taoto manino mai ai i tua atu o le fa’atalitali le onosa’i e fa’atalitali ai pea ma le onosa’i fa’atuatua tusa lava po’o le ā le umi, auā o lo’o silafia e le Atua. O le onosa’i e fa’atali i le Atua e maua ai manuia ma fa’asinoga tonu o le ola o tagata uma.

O le tala la i le Aso Penetekoso po o le aso o le afio ifo o le Agaga Paia. E pei ona ta'ua i le galuega 1: 8, le folafolaga a Iesu i ona so'o, e maua e i latou le mana, pe a afio ifo le agaga Paia i luga ia te i latou, e fai ai i latou ma molimau ia Iesu Keriso, pe a tu'ua e Iesu la latou mafutaga. Lea la ua amata le mataupu lenei e 2 o le tusi i Galuega, i le fa'apea mai o le tusitala, "Ua o'o atu foi i le aso Penetekoso, sa i ai uma i latou i le mea e tasi ma le loto gatasi" O lona uiga, o lea ua potopoto fa'atasi le 'au so'o ma isi tagata i le mea e tasi ma le loto gatasi, e fa'atalitali le meaalofa lea na folafola atu e Iesu ia te i latou.

O LE A LE MEAALOFA:

O LE AGAGA PAIA O LE ATUA, o le meaalofa sili lea sa fa'atalitali i ai le 'au so'o, ua vala'auina foi i tatou o aso nei ina ia fa'atāua pea le fa'atalitali i le Agaga o le Alii I taimi uma e le aunoa, auā e manuia ma tonu ai le gasologa o le olaga. E ui lava ina ua tu'ua e Iesu le latou mafutaga ma ona so'o, ae ua talia lava e le 'au so'o i o latou loto fetalaiga a Iesu, e fa'atali mo le afio ifo o le Agaga Paia. O le ata e pei ona i ai o le mea na tupu i lea aso. Fai mai o le matagi ua agi tele mai ma ua tumu ai le fale uma sa i ai i latou. O le upu matagi tupulaga i lona fa'aliliuina mai le gagana Eperu, e tutusa ma le upu Agaga. O lona uiga o le matagi lea na agi malosi mai ma fa'atumuina ai le fale sa i ai le 'au so'o, o le Agaga Paia lava lenā o le Atua, e pei ona folafolaina mai e Iesu.

Ua iloa foi e i latou sa i ai i lea taimi ma latou molimau i le mea na tupu, o laulaufaiva ua peisea'i o le afi, ua vaevaeina i luga o le 'au so'o, ma ua latou fa'alogu atu foi, ua tautatala mai le 'au so'o i gagana 'ese'ese, e ui o i latou uma o Iutaia. O lona uiga o le matagi, o le Agaga Paia lea o le Atua, ae o laulaufaiva afi, o gagana ia a le lalolagi ua tu'uina atu i le 'au so'o, latou te tala'i ai le Talalelei ia Iesu Keriso. O le vavega ua tupu, ina ua fa'atalitali ma onosa'i le 'au so'o i le Agaga Paia o le Atua.

UPU FA'AI'U

Le tupulaga e, o le vavega ua tupu ina ua fa'atalitali ma le onosa'i le 'au so'o i le Agaga Paia, e ese le tāua o lea ola mo tatou uma. O le tele o taimi tatou te faia ai fa'ai'uga sesē ma tatou pau'u atu ai i le agasala, ina ua tatou lē lavātia ona onosa'i ma fa'atalitali i le Alii. Ia manatua tupulaga, o le Agaga Paia o le Atua, e lē sau fa'anatinati pe sau I sou mana'o fa'atopetope, ae e malosi ma mata'utia lona pa'i mai i le loto o le tagata pe ā o'o ina sau. Ae ā oo foi ina afio mai ma e talia i lou loto ma faalogo ma le usita'i i ai, auā o le Atua lava lenā ua afio mai i o tatou loto na te fa'atumu i tatou i le moni ma le faama-oni ma le sa'o atoatoa o ā tatou fa'ai'uga. O i'ina foi tatou te lagona lava le mafanafana, ma e tutupu foi vavega i o tatou olaga. O le upu moni lava lea. E mafua ona lē tutupu ni vavega i o tatou olaga, ona ua tatou fa'amoemoe i lo tatou lava malosi ma le poto, ae ua tatou lē tapā se fesoasoani mai o le Agaga Paia o le Atua, ma tatou fa'atalitali i ai ma le onosa'i. Ia manatua e lē manuia se fa'atalitali pe ā leai se onosa'i. Na mafai lava e Iesu ona fa'atino mea uma lava na afio mai e fa'atino, e o'o lava i lona maliu. Na mafaia e Iesu ia mea, auā sa fa'amoemoe tasi ma fa'atalitali pea ma le onosa'i i le fa'atonu mai o le Agaga Paia o le Atua. O le agaga o le malosi lea na ia maua ai le malosi e fa'ataunu'u le fa'aolataga mo le lalolagi. Tupulaga, aua le vave le mana'o ae leai se onosa'i e fa'atalitali ai i le fa'atonu mai a le Agaga Paia o le Alii. Aua le faia i le malosi ma le poto po'o le fa'aaog foi o le maso, auā e lē tutupu ai ni vavega, ae tutupu ai matagā e lē fia o'o i ai. Fa'atalitali ma le onosa'i, ae aua le fa'atalitali ma ita. Fa'atali i le tatalo ae le o le fa'amoemoe i le atamai. Ia manatua e lē fa'ailoaina atu e le Agaga Paia o le Atua ia te oe ni mea sesē ma le matagā, na o mea manuia ma le ta'uleleia. Aua le te'ena fa'amolemole.

O NAI A'OA'OGA E MAFAUFAU LOLOTO I AI

1. O le fa'atalitali i le Atua po'o le Agaga Paia, e faia lea i le tatalo ma le fa'atuatua, ona sa'o ai lea o au fa'ai'uga.
2. E tutupu vavega i o tatou olaga pe a fa'atalitali i le Agaga Paia o le Atua ma le onosa'i, e aunoa ma le masalosalo.
3. E faia e le Atua mea silisili mo tupulaga e lava le onosa'i.
4. Fa'alogu, usita'i ma talia e manuia a.
5. Fa'aopoopo ane ma nisi a'oa'oga fa'amolemole.

FESILI FA'ATUPU MANATU

1. O le a se fa'afitauli ua to'ilalo ai tupulaga i nei aso, ua fa'atupula'ia ai le t'oatele ua nofosala i le falepuipui?
2. O le a sau molimau fa'atalavou e mafai ona e fesoasoani ai i ia tupulaga ua pau'u atu i le agasala, o le te'ena o le Agaga Paia?
3. O le a se feau t'aua ua momoli mai le mataupu i lenei afiafi ua a'oa'oina ai lou talavou, a'o feagai ma faigata o le olaga ua i ai nei?

OU TE FIAFIA LAVA I SI PESE LEA A LE AOGA ASO SA:

- | | |
|--|--|
| <ol style="list-style-type: none"> 1. O e fa'atali i le Alii, e fa'afouina i latou
Fa'aloaloa apa'au pei o aeto
Savavali saogalemu, taufetuli e le vaivai
Lavea'i, lave'ai mai le Alii e, 2. O e talitonu i le Alii, e fa'afouina i latou
Fa'aloaloa apa'au pei o aeto
Savavali saogalemu, taufetuli e le vaivai
Lavea'i, lave'ai mai le Alii e. | <ol style="list-style-type: none"> 3. O e fa'atuatua i le Alii, e fa'afouina i latou
Fa'aloaloa apa'au pei o aeto
Savavali saogalemu, taufetuli e le vaivai
Lavea'i, lave'ai mai le Alii e. |
|--|--|

MANUIA TEL LE ASO SA O LE PENETEKOSO

**ASO SA – ME 31, 2026 “AGANU’U” (E FA’AVAVAU AIGA”) (Fa’auau)
MATAUPU – “O LE FA’AMATAI” (Vaega 3)**

FA’ATOMUAGA:

O le toe fa'auauina leni o le tatou fa'asoa mai le masina o Mati ua tuana'i, i se taumafaiga e fesoasoani atu i nisi o tupulaga ina ia manino ma malamalama i nai fa'avae ta'oto ia o le tatou aganu'u i lalo o le mataupu o aiga. Ua ta'ua lava i le amataga, e lei se iloa ua lava i lea mataupu, peita'I, ua taumafai lava e aoao mai nai a'oa'oga faigofie tatou te momoli ai; e feau i tupulaga. Ua taumafai lava e fa'apu'upu'u atu, ae ta'oto atu lava i lona fa'amalamalamaina i a outou Susuga ma le 'au fai tofa i Autalavou ma 'aulotu e fesoasoani ane i le fa'alateleina.

O LE FA’AMATAI – FOLASAGA:

E ao i le tagata o lo'o su'esu'e i leni mataupu ona malamalama lelei i le uiga o le upu matai, o ituaiaga o matai, tulaga ma va fa'ale -matai, ma o latou tiute fa'apitoa, auā le tausiga o aiga, ma nu'u. E ao foi ona silafia e soālaupule e le 'au aiga le faigā filifiliga, ma uiga fa'apitoa e agava'a ai se tasi e fai ma se matai e tausi le aiga, nu'u, aemaise ai o le vai i fafo. E t'aua le manino ma silafia lelei le auala e tausi ai e le matai lona aiga ina ia manuia tagata uma ae le na o nisi. E i ai foi tiute tausi mea fa'apitoa o le matai i le tausiga o le nu'u, tainane foi le Ekalesia o lo'o nofo auaua ai.

FA'AUIGAGA MA LE FA'ALILIUINA O UPU (Fa'amolemole fa'amalamalama upu ia manino)

1. aganu'u -----customs practiced through Samoa
2. agaifanua ----- customs specific to the village or district
3. agava'a ----- the most suitable or the best fit
4. aiga tupu ----- Royal families
5. alii -----paramount chief
6. alii sili ----- of highest status
7. aliita'i ----- highly respected
8. aliiatuāpa'usisi -----the matai respects and follows the wishes of the family
9. 'autasi ----- to be in unity
10. fa'ae'e -----to be bestowed the matai title
11. faleupolu -----orator or talking chief
12. faigānu'u -----activities performed by the village
13. fa'alupega -----honorifics
14. fa'amalumuluga -----to be under one's protection
15. faletama -----children of the same clan
16. fa'aaloalogia ----- respectful
17. fa'atula'i ma le nu'u -----banished from the village
18. fa'atulafonoina -----to make it legal
19. fa'aui le 'ula -----a chief releasing his matai title/duties to one of his children
20. fili -----select or choose
21. itupaepae -----clan
22. mapuitiga -----to suffer
23. matafaioi -----specific role and responsibilities
24. matai ----- a chief who sets good examples for his family
25. māta'i ----- to closely observe one's behavior
26. meatotino ----- something that belongs to someone
27. nofo/saofa'i ----- bestowment of chiefly title
28. pitovao ----- a chief who is aged and cannot participate
29. pou o matuā tala ----- this post is designated for the highest paramount chief.
30. saogālemu -----safety
31. soālaupule ----- to deliberate
32. tatata le suafa -----all family members are eligible to receive the title
33. toe uluta'ia -----elderly chief/orator
34. to'oto'oalii -----the alii speaks
35. tula -----one of the highest rank or status
36. tulāfalealii ----- a matai who holds both a paramount and orators title
37. tulāfale sili ----- an orator of highest rank/status
38. tulaga aloa'ia -----of good status
39. tu'ua -----an orator of highest status chosen as leader of the village
40. tupito -----specific for/to
41. vaialii ----- paramount chiefs of lower rank/status
42. vaitulāfale /vaipou-----orators of lower rank/ status

UPU FA'AI'U

Malo le onos'ai, ua manatu ua lava lea fa'asoa i nai upu ia e lautele ai le fa'amalamalamaina o le mataupu. Fa'amolemole aua le taofia ni lagona lelei e 'ese'ese ai ma le fa'asoa ua tu'uina atu. Fa'asa'ane se vaivai fa'amolemole mo nai tupulaga. Toe feiloa foi i se Aso Sa oi luma.

MANUIA LE FA'ASOA O LENEI AFIIFI

ASO SA – IUNI 07, 2026 “SU'ESU'EGA I LE TUSI PAIA”

MATAUPU – “E LĒ O SE MEA MĀLIE”

TUSI FAITAU – KENESE – 18: 1 - 15

SINI – Ia maua e tupulaga se malamalamaga 'anoa i le finagalo o le Atua, ia malamalama i latou, e fola- fola e le Atua i le tagata mea moni, sa tutupu, ua tutupu, ma o le ā tutupu, ae lē o ni mea mālīe i le tagata.

FESOASOANI MO LE MATAUPU –

O le loto lē talitonu o le tagata, e mafuli lava lona fa'ataunu'uina i le faifai i ai o tala, fa'asolo ane ai ma le a'amu, se'ia o'o ai lava ina avea o se mea mālīe i le mafaufau pe ā manatuaina i se taimi. O se tasi aso i le aoauli a'o nofonofo le toeaina o Aperamo i lona fale, na ia iloa ai ni tagata se to'atolu o lo'o tutū mai iā te ia. Ona ia momo'e lea ma fa'aefe iā te'i latou i lona fale, e tusa ma tu ma aga talimalo e masani ai le 'au sisifo (Easterns) . O nei tagata e mafai ona fa'amatalaina o ni tagata asiasi (visitors), peita'i, e manatu le to'atele, o ni agelu a le Atua.

E le'i silafia e Aperamo nei tagata ua afea lona aiga. Ae o le fa'afeiloa'i atu a Aperamo iā i latou e ala i lona ifo to'ele, ma lana augani ina ia mulumuluina e ia ma lona aiga vae o i latou ia, fa'atasi ai ma se taumafataga e tapena e ia ma lona aiga mo nei tagata, ua lava lea ma totoe e manino mai ai le manatu ma le lagona o le toea'ina o Aperamo, ina ia fa'amanuia mai le Atua iā te ia ma lona aiga. Sa fa'atino e Aperamo le talimalo lelei i nei tagata, ina ua ia tapena le mea'ai lelei ma a'ai ai ma nei tagata e to'atolu ua afea lo latou aiga.

O le mana'o ua taunu'u o Aperamo, ina ia fa'atino se 'au'aunaga a'o se talimalo i tagata ua afea lona aiga. O le fa'amatalaga o le taumafataga sa tapenaina e Aperamo, e fa'apei o le tama'i povi muamua, o sea o falaoa mo ni potoi areto, fa'atasi ma suāsusu i le taumafataga, ua na o le tupu e talisua ai. O lo'o atagia ai le maualuga o le fa'aaloalo a le toea'ina o Aperamo i tagata ua afea lona aiga. O le finagalo o le Atua, o ai lava ua faia i ai se galuega lavea'i po'o se galuega alofa, o ia lava lea ua e faia i ai. Atonu o le lagona lea sa iā Aperamo na fa'ama'ite ai le gaioiga sa ia faia. Na a'ai fiafia nei tagata ma o latou fa'amanuia iā Aperamo ma lona aiga. Ua fesili foi i latou, po'o fea lana avā o Sara, ma ua fa'amanuia i ai, e ala i le fanauina e Sara o se tama tane mai i lona lava manava. Na lagona e Sara le tala ua 'aumai, ma o se fa'amanuiaga mo lo lāua aiga. Peita'i, o le o'o mai o le feau iā Aperamo ma Sara, na tu'ufesilisili ai manatu ma lagona o Sara, ona ua matutua lo la soifua ma Aperamo. I le manatu o Sara, e lē toe mafai i le iloa o le tagata ma le gasologa o le ola, ona ua te'a o ia ma le tulaga o se tama'ita'i, e mafai ai ona ia toe fanaua se pepe i lona manava. E o'o foi iā Aperamo lona to'alua po'o lana tane, ua pasi ma le tulaga fa'atama tane, e mafai ai ona tupu mai ai iā te ia se tagata fou. O le ala lea o le 'ata'ata o Sara, ona o le tulaga lē mautonu ma lē talitonu ua fa'ate'ia ai o ia. Ua mālīe iā Sara le tala ua 'aumai, ona o lo'o taofi o ia i lagona fa'ale- tagata, ma le natura o le soifuaga. Peita'i, e aunoa lava i le 'olomatua o Sara se lagona o le Atua fai vavega, ma le Atua folafola. E le'i lilo i le silafaga a le Atua le

‘ata’ata a Sara. O le ala lea o le fesili atu o le Alii iā Aperā’amo, po’o le ā le mea ua ‘ata’ata ai Sara. Ua galo iā Sara, e leai se mea e lilo i le silafaga a le Atua. O le Atua fai vavega, o le Atua silisili – ese, e pule aoao i mea uma lava e o’o lava i le soifua ma le ola o le tagata. O le Atua lea, e leai lava se mea e faigatā i le lagi ma le lalolagi, e lē mafai e le Atua ona fai. Po o le ā lava le matutua o Aperā’amo ma Sara, e mafai lava ona ia fanauina se fanau, i le pule a le Atua. O le Atua foi lea o so’o se mea lava e folafola e le Atua i le tagata, e taunu’u lava. E lē fa’avelaveina e se poto ma se malosi o le tagata po’o se isi lava mea ola. Sa fāoa e le fefe le loto o Sara, ina ua fa’alogo atu i le fetalaiga a le Alii, o lo’o atagia ai le tala ua tuu’ina mai, e lē o se mea mālīe, ae o le tala i le mea mo’i ma le moni o le ā tupu. Sa mālīe le fa’alogo a Sara, ona o le lē mautonu ma talitonu, ua galo ai e taunu’u mea uma e folafola e le Atua auā o mea mo’i ma le moni lava. Sa mālīe foi i le mafaufau o le tagata, ona ua fa’amamafa le tala ua ‘aumai, a ua lē fa’amamafa i lē e ana le tala ua ta’uina mai. Ua toe fefe foi la e ea? E lē o se mea mālīe o le mea mo’i. Aua le fia mālīe i mea mo’i.

A’OA’OGA E FIA FA’AMAMAFI I TUPULAGA

1. O mea ua folafola e le Atua, o mea mo’i, e lē fia mālīe i ai se isi.
2. Tali ma le fa’amaoni fa’aaliga mai le Atua, e manuia ai.
3. Fa’alogo i le Atua, e fa’amanuia mai iā te oe, ae aua le fia mālīe valea.

FESILI E FETUFA’AI AI:

1. O le ā sau fa’auigaga i le upu lea ma sona feso’ota’iga i le tatou mataupu? “E lē o mea uma e i’ila o auro ia”
2. Aiseā ua tele ai ina logonoa tupulaga i afioga a le Atua, e ui lava ina iloa e pule aoao le Atua i mea uma, e o’o lava i le ola o le tagata?
3. Ua fa’a – fa’agogo tagi ao i tupulaga afioga a le Atua, ae ua mamao lava ma le ola ai. Aisea?
4. O le ā sau fautuaga fa’a -talavou mo nisi tupulaga o manatu o afioga a le Atua o le mea mālīe, e lē moi?

MANUIA LE AFIAFI, MALO LE ONOSA’I



ASO SA – IUNI 14, 2026 “FA’ATALATALANOAGA MAI LE TUSI PAIA”

MATAUPU – “O IOSEFA MO ASO NEI.”

TUSI FAITAU – KENESE - 39

SINI – Ia malamalama tupulaga i nisi o uiga tāua o Iosefa mo le olaga o Tupulaga mo aso nei, atoa ai ma nisi au’upega e manumalō ai i fa’aosoosoga.

FA’ATALATALANOAGA MAI LE TUSI FAITAU – (Fa’atinoga)

E lelei ae amata le fa’atalatalanoaga i nai fesili ia o le tusi faitau e tatala ai manatu ma lagona o le tupulaga ma fa’auau atu ai i le i’uga o le mataupu. Ia su’esu’e fa’atasi le Autalavou i le tusi faitau. Ia fa’aaoga fesili ua saunia e ta’ita’i ai le fa’atalanoaga.

1. Aiseā na o’o ai Iosefa i le aiga o Potifara i Aikupito?
2. O le ā le fa’amanuiga na iā Iosefa na manumalō ai i so o se mea faigatā na o’o iā te ia?
3. O le ā le tau o le tagata fa’amanuaina e le Alii na maua e Iosefa i le aiga o Potifara?
4. O ā ni mea lelei iā Iosefa na avea ma auala o le fa’aosoosoga mo ia?
5. O le ā le fa’aosoosoga na feagai ma le taule’ale’a o IOSEFA?
6. Na fa’apefea ona manumalō Iosefa i le fa’aosoosoga?

7. O ā foliga o le tiāpolo na fa'aalia e le to'alua o Potifara?
8. O ā ni a'oa'oga mo Tupulaga mo aso nei e maua mai iā Iosefa e tusa ma le tusi faitau?
9. E mafai ona avea oe ma Iosefa o aso nei mo isi tupulaga ua maua e le tiāpolo?

FESOASOANI MO LE MATAUPU-

Na o'o Iosefa i le aiga o Potifara, ona sa agaleagaina e ona uso, ma o latou fa'atau o ia i tagata Mitiana, o le 'au Isamaeli, o i latou ia na latou fa'atau atu Iosefa iā Potifara i Aikupito. Sa iā Iosefa le Alii e pei ona manino i le tala (fuaiupu: 2, 3, 21, 23). O le malosi sili lea na manumalō ai i mea faigatā uma sa fetaia'i ma ia. E ui o se pologa, ae sa iloa e Potifara o Iosefa o le tagata o le manuia. Sa alofagia Iosefa e Potifara, ma na ia tofia o ia e pule i lona aiga ma ana mea uma.

O Iosefa o se taulealea aulelei tele i lona tino ma ona mata, ma sa avea ma auala na manao ai le avā a Potifara e mulilua ma ia. O loo manino le togafiti leaga na fai e le fafine ina ia agasala ai Iosefa. (f:7-20).

E tele mafua'aga na ala ai ona manumalō Iosefa i le fa'aoso'osoga.

1. Sa iā te ia le Alii – o le malosi lea na manuia ai mea uma na ia faia.
2. O Iosefa o le taule'ale'a atamai – E iloa i lona mata'u i le Atua, ma lona iloa lelei, o le agasala le mea o lo'o fa'aoso'osoina o ia e le to'alua o Potifara e fai.
3. E fa'amaoni le alofa o Iosefa i lona matai o Potifara. (fuaiupu e 9)-O lona alofa iā Potifara i le fa'atuatuaina o ia, na amio fa'aaloalo ai, ma musu e tali le mana'o leaga o le to'alua o Potifara.

O foliga o le tiāpolo na iloa i le amio a le to'alua o Potifara, a'o le lē alofa faamaoni i lona toalua, o le fai togafiti leaga, o le fa'aosooso o tagata e fai le agasala, aemaise o le taumafai pea ina ia fai le agasala.

O NAI A'OA'OGA MO TUPULAGA O ASO NEI –

1. Ia tatalo fa'amaoni i le Atua ina ia fa'atasi mai i o tatou olaga. O le malosi lea na leoleoina Iosefa ina ia loto alofa fa'amaoni, ma tete'e atu i le agasala. E pei lava o a'oa'oga a Iesu, e lē mafai e le tagata se mea e aunoa ma le Atua.
2. Ia alofa fa'amaoni i tagata e alolofa fa'amaoni iā i tatou. O le alofa fa'amaoni o Iosefa iā Potifara, na ia lē paū ai i le agasala.
3. Ia mataala i fa'aosoosoga e o'o mai ona o ni mea lelei o lo'o i le tagata. E tāua le 'aulelei ma mea fa'apenā, ae telē le avanoa e mafai ai ona fa'aosoosoina oe e le tiāpolo ma faigofie ai ona paū atu i le agasala. O le fautuaga lava a si tusitala o lenei mataupu, O le 'auala malosi e te malō ai i fa'aosoosoga, o lou alu 'ese mai le mea po'o le nofoaga o lo'o fa'aosoosoina ai oe.
4. Ia iloa togafiti leaga a le tiāpolo o lo'o 'auala 'ese'ese mai, e pei ona iloa i le amio sesē a le to'alua o Potifara. Aua le fa'asesēina lau fa'alogo i leo suamalie o fa'aosoosoga, ae fa'alogo toto'a i le i'uleo o le Agaga Paia i lou loto.
5. Aua le fefe e tali atu i le leai i mea sesē e taumafai ane ai nisi. O le leai a o le leai. (No means No) fai mai ai le isi palagi
6. O le tagata atamai, e mata'u i le Atua ma musu e fai le agasala.

TOE MANATU –

O le tatalo lea, a mafai ona maua e tupulaga ia uiga lelei uma i o latou olaga, e lē taumate o le ā mafai ona latou ola i se olaga fa'apa'iaina. O le olaga lea e lelei ai mea uma ma maua ai manuia o le Atua.

Fa'amata e mafai ona avea oe ma Iosefa mo tupulaga o aso nei? Amuia oe!!!!

**ASO SA – IUNI 21, 2026 – “MATEGA TUPUA” (ASO SA O TAMĀ)
MATAUPU – “NISI O IGOA ILOGA O LE FEAGAIGA TUAI”
UPU TOMUA –**

Ua manatu o le ā le umi se fa’asoa o lenei afiafi, ona sa tua i faiva le Aso Sa i le fa’amanatuina o le nei aso tāua o Tamā. O le mea lea, ua manatu ai e lelei ae vavae foe i si ta’aloga pu’upu’u lea. Fa’amolemole, aua le ta’ua le tali o le tupua i le Autalavou, ae galulue muamua e saili mo sina 20 minute, ona fa’asoa loa lea ma ta’u i ai le tupua, atonu e faigofie ai ona mateia. O le tupua o lo’o i le Upu fa’ai’u o le mataupu. E pu’upu’u lava ae ‘anoa mo tupulaga.

NISI O SUAFA O LO’O I AI LE FEAGAIGA TUAI:

1. **REUPENA:** O lona uiga – “**Fa’auta o le tama**” Ua silasila mai le Alii i lo’u tigā, o lenei e alofa mai ai la’u tane iā te a’u. (Kenese – 29: 32)
2. **SIMEONA** – O lona uiga – “**O lo’o fa’afofoga**” Auā ua fa’afofoga e le Alii o lo’o inosia a’u, o le mea lea ua na aumai ai iā te a’u lenei tama foi. (Kenese – 29: 33)
3. **LEVI** – O lona uiga – “**O soso’o**” O lenei a soso’o nei o ma loto ma la’u tane, auā ua ou fanau iā te ia tama tane e to’atolu. (Kenese – 29: 34)
4. **IUTA** – O lona uiga – “**O vi’iga**” O lenei ou te vivi’i i le Alii. (Kenese – 29: 35)
5. **TANU** – O lona uiga - “**O fa’amasinoga**” Ua fa’amasinoina a’u e le Atua, ua ia fa’afofoga mai foi i lo’u leo, ma na aumai iā te a’u le tama tane. (Kenese – 30: 6)
6. **NAFATALI** – O lona uiga – “**O fagatuaga**” O fagatuaga tetele ua ou fagatua ai ma lo’u uso, ua ou manumalō ai foi. (Kenese – 30: 8)
7. **KATO** – O lona uiga – “**O le ‘au**” O lo’o sau le au. (Kenese – 30: 11)
8. **ASERA** – O lona uiga – “**O amuia**” Amuia a’u auā e fa’a-amuia mai fafine iā te a’u. (Kenese – 30: 13)
9. **ISAKARA** – O lona uiga – “**O le tau**” Ua foa’i mai e le Atua lo’u tau, auā na ou avatu la’u auauna i la’u tane. (Kenese – 30: 18)
10. **SEPULONA** – O lona uiga – “**O loo mau**” Ua foa’iina mai e le Atua iā te a’u le oloa lelei, o lenei o le ā ma mau ma la’u tane, auā ua ou fanau tama tane e to’aono iā te ia.
11. **IOSEFA** – O lona uiga – “**O fa’aopoopo**” E fa’aopoopo mai e le Alii iā te a’u se tasi tama tane. (Kenese 30; 24)
12. **PENANI** – O lona uiga – “**O le tama na ou tigā ai**” (*Fa’aigoa ai e lona tina o Rasela, ma oti ai*). **PENIAMINA** – O lona uiga – “**O le atalii o lo’u lima taumatau**. (*Fa’aigoa ai e lona tama o Iakopo*) O le tama lea e lua ona igoa. (KENESE 35: 17 – 18)

FA’AI’UGA: O si fa’asoa faigofie lenā o le afiafi, pe afai e lē pisi le fa’ai’uga o le aso o tamā e talatalanoa ai ma nai tupulaga. Ae fa’amolemole o le tupua mo tupulaga, **“Ia mate mai e tupulaga, le gafa o i latou ua ta’ua igoa ma le tamā ma le tinā na tupuga mai ai”**

**MANUIA TELE LE ASO SA O TAMĀ
ASO SA – IUNI 28, 2026 “FA’AALIGA MA LE FA’AFETAI”**

MATAUPU – “TAPENAGA MO LE FONOTELE”

E lē toe po le silafia i le fa'amoemoe o lenei tausaga i le Fonotele a le Ekalesia e pei ona masani ai. O le tausaga e ese mai ai ona tapenaga mai tausaga e leai ai se Fonotele. E silafia foi o le taumafaiga a lo tatou Ofisa nei ina ia a'afia uma tupulaga i tauaofiaga a le Ekalesia, e ala i lo latou sao e pei ona tapena ma sauni mai i ai. E lē gata o ta'aloga, a'o fa'afiafiaga ma tapenaga fa'ale-agaga. Ua molimauina foi e le Ofisa, le mana'omia e Pulega ma Autalavou uma ni taimi fa'aopoopo mo ia tapenaga. O le mea lea ua i ai le taofi o le tusitala e fa'apea, Mo le tolu vaiaso o lumana'i e amata atu i le Aso Sa lenei:

1. O le ā tu'u atu le avanoa e tapenapena ai Pulega ma Autalavou mo o latou sao mo le Fonotele o lenei tausaga. A ma'ea le Fonotele ona soso'o lea o le malōlōga mo le vaiaso e tasi, ma toe amatalia ai Aoga Aso Sa ma Autalavou iā Aukuso 02, 2026.
2. Fa'amoemoe lava o le ā tatou fa'amalolosi mo a tatou fuafuaga uma mo le vi'iga o le Atua e ala i le sao o tupulaga i lenei tausaga.

Avea foi lenei avanoa tāua e momoli atu ai le fa'afetai tele iā outou Susuga i Toea'iina ma Faletua, Fa'afeagaiga ma Faletua, aemaise le lavaloa o Faiaoga o le Aoga Aso Sa ma ta'ita'i o Autalavou, mo le galuega fitā i le 'afa muamua o le tausaga ua ma'ea nei. Malō le onosa'i fa'afetai le pale, lagona e lē faigofie o outou faiva ma tiute, ae o le tatou galulue fa'atassi ua i'u ai i le manuia le amataga o lenei tausaga ma ona galuega fa'agasolo. Fa'afetai le lagolago mai, malō le fa'atoatoa.

Manuia tele tapenaga o le Fonotele, i le mafuta mai o le Agaga Paia iā i tatou uma, tatou te faia ai mea uma mo lona vi'iga. Fa'amagalo se aleu o le Ofisa i se 'au'aunaga ua lē tau tamāli'i i le silasila ma le fa'afofoga.

Fa'afetai ma ia fa'amanuia tele atu le Atua.

MALOLOGA MO LE FONOTELE – 20206

TATOU FEIILOA'I IA AUKUSO 02, 2026.

////////////////////////////////////

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



Ianuari - Iuni

2026



TUSI MO MAFUTAGA AUTALAVOU

Saunia :

Ofisa o A'oa'oga Kerisiano